



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 8

Kü taküm otsü film yanglutsü metemsü: Dharmendra

TAPAK 9

Northeast nung telungpur rara ajema kümdar: Rajnath



VOL. XIV NO. 226 (ADOK 226)

DIMAPUR

SUNDAY

JUNE 04, 2017

5.00

Rongmei kin agizükba sorkari meyipa agir

Dimapur, June 3 (TYO): August 4, 2012 nü Nagaland sorkari Rongmei kinji Naga nung lisopur kintem rongnung ka ta züngokba Cabinet-i lemtetba meyipa agir, ta sorkar sangdong ka nung metetdaksü. December 1, 1963 matongdang Nagaland nung arua aliba tanga indigenous nisungtem den kasa asütsü, ta sorkar sangdong nungsa metetdaksüogo.

process ka ajanga Nagaland sorkari jangjateta alirtem, parnok nungi jakzükertemi dang Nagaland nung lisopur den temeten aser maongka kasa angutsü. Ibaji December 1, 1963 matongdang Nagaland nung arua aliba tanga indigenous nisungtem den kasa asütsü, ta sorkar sangdong nungsa metetdaksüogo.

EC-i ayongba EVM Hackathon agiogo

New Delhi, June 03 (Agencies): Honibarnü Election Commission of India (ECI)-i ayongba Electronic Voting Machine (EVM) hackathon agiogo, aser iba sentong nung yimtenren party ana- NCP aser CPI (M) nati dang shilem agia liasü. Chief Election Commissioner of India, Naseem Zaidi-i, party anapronglai EVM hack asütsü memerang, saka EVM amshia sayuba dang reprangogo, ta ashi.

Pai, "Party anapronglai electronic voting machines amshibayim agi temulung süogo," ta ashi. Osangbenertem den jembidang EC-i agiba agi, NCP nungi teshimtet züngsemtemi iba tayongzükba nung shilem magi, saka EC dang ECI indang EVMs aser State EC EVMs na bendangba system tajungba yanglushitsü atema mepishi. (Maneni tapak 11 nung...)

PADC-i ADC meshiba magizüker: AAPSU

Itanagar, June 3 (Agencies): Linük Temzüng nung Arrla 371(A) kübok Tirap, Changlang aser Longding district tem nem Autonomous District Council (ADC) agüjang ta Patkai Autonomous District Council (PADC)-i ahangba magizüker ta All Arunachal Pradesh Students' Union (AAPSU)-i tanüa nenshia metetdaksüogo. 1963 küm Nagaland nem state jenjang agütsüdag Arrla 371(A) ji parnok nem balaka agütsüba lir aser ibaji 1960 agreement nung shia aliba ama inyakba lir. Ajsüaaka, PADC-i Nagaland Statehood Bill nung

ajemdaker ADC akhangar. Iba ya tebilemsü tulu ka lir aser odangbo metoktsütsü, ta AAPSU-i metetdaksü. "Tirap-Changlang-Longding (TCL) nung alirtemi tanga state ka indang Statehood Bill nung ajemdaker masü saka Sixth Schedule kübok Autonomous District Council tentetsü atema takhangba agütsüba asoshibo AAPSU-i anema menokdaksü" ta parnokisa ashi. "Ajsüaaka, PADC-i Linük Temzüng Arrla 71(A) kübok ADC agüjang ta takhangba agütsüba anema maneni nokdaksü" ta AAPSU-isa shisem.

Dimapur nung prangpong yangludak ka makdok

Dimapur, June 3 (TYO): Osang tejangja ka angazükba sülen HQ IGAR (North) kübok 41 Assam Rifles-i June 3, 2017 nü Dimapur kübok Lhomithi, Signal Basti nung prangpong injang yangludak ka mita ao. Iba mapang Assam Rifles sepaitemi arms fabrication unit ji makdok aser nisung ka apu. Paji Lhomithi nung alir arishi küm 29 tain Kiyoka Yephthomi ta jangjaogo, ta PRO, IGAR (North), Lt Col Amitabh Sharma-i sangdong ka nung metetdaksü.

Kiyoka-i prangpong yangluba, shibelenba aser telungpur dang ayokba nangzükogo. Pa ket nungi 9 mm Carbine Machine Gun den magazine, Pt 22 mm Pistol ka den magazine, semi fabricated 9 mm Pistol, Pt 22 mm Pistol, G-4 Assault type Rifle aser tanga osettem aika ngutetogo, ta sangdong nungsa shia lir. Pa den külemi apuba osettemji Sub Urban Police Station, Dimapur ket nung agütsüogo, ta PRO, IGAR (North) sangdong nungsa metetdaksü.

Meimchir atema lendong tulutibaji kiralongraba lir: Modi



June 3, 2017 nü Paris nung aliba Elysee palace nung India Prime Minister Narendra Modi aser France President Emmanuel Macron nati teka ayiploksüba noksa nung angur.

Paris, June 03 (Agencies): Tanü France yimtiba, Paris nung India Ato kilonser, Narendra Modi-i alima linüktem dang, kiralongraba aser alima tsüngsang-mopung melenshiba anema ano taliba raratsüla, kechiyong ana ya ali meimchir atema lendong tulutiba lir, ta metetdaksü. Tanü Paris nung aliba Elysee Palace nung France Tir, Emmanuel Macron den külemi osangbenertem den jembidang Modi-i, "Tanü alima atema lendong tulutibaji kiralongra lir.

Asenok alima nung linüktemi linük sasep nung aser linük aika longjemer inyaka arur," ta ashi. France linüki alima tsüngsang-mopung melenshiba anema meranga raraba atema tenüngsang agüja Modi-i, "France-i alima tsüngsang mopung melenshiba anema nendaka inyaker aser maneni inyaksü. Paris accord framework nungdang masü saka mapa onoki mapa agi inyaksü," ta ashi. Alima nung fossil fuels ajema

amshitsü atema France Tir-i International Solar Alliance atema inyakba asoshi pa nem tenüngsang agütsü. Kasa senden nung France Tir Macron-i, pai India den defence, maritime security aser intelligence nung amalitepa inyaksü, ta metetdaksü. Paisa, "India-i kiralongra anema rarabaji France-ia nungiter," ta ashi. "Asen linük nüjiso atema India nung sepaia aika süogo, aser ibaji asen linük ana tesendaktep ajanga kuli sayur," ta Macron-isa shisem. Tanep Modi-i France Tir tasenba, Macron den linük ana dak sendakba onüktem aser alima onüktem- kiralongra aser climate change nung o lemtepa liasü. Modi-i, "India aser France na alemli nungi tesendaktep junga lir," ta ashi. Modi tanep Russia nungi France-i oa liasü. Iba jakdang pai Russia Tir, Vladimir Putin ajurua senden amenba den külemi international economic forum nung dena liasü. Modi-i Germany aser Spain na semdanga lenirtem ajurua senden amenba sülen pai Russia semdang, iba sülen tang tesüsa France semdangogo.

Election Department den yariteptsü atema State Core Committee tentet

Dimapur, June 3 (TYO): 2010 küm tenzükba Systematic Voters' Education and Electoral Participation (SVEEP) ya Election Commission of India indang tongtipang sentong ka kümogo. SVEEP indang nükjidongji election nung nisung teimbai shilem agitsü, voting dak sendakba timi inyaksü aser nübor nem electoral aser democracy education agütsütsü atema lir, ta DIPR sangdong ka nung metetdaksü. SVEEP - III Project Document 2016-2020 nung India ajungalen voter education

agütsütsü aser ibaji polling station ajak nung vote agütsür shia atongtsü atema alizüng lir. 13 buba Nagaland Legislative Assembly indang general election ji 2018 küm tetenzüklen agitsüba lir aser iba asoshi nisung ajaki Election Commission den yaritepa mapa inyaksüla, ta sangdong nungsa shia lir. Taruba assembly election nung nisung teimbai election nung vote agütsüdagtsütsü atema sentong kar agitsü lir aser itemji, arishi küm 18-21 tsüngda alirtem electoral roll nung tenüng

züluoktsü atema Special Drive agitsüba, October 1, 2017 nungi Special Summary revision of electoral roll agitsü, January 25, 2018 nü 8 buba National Voters' Day amungtsüba, aser teküpokba jenjang tashi nung vote agitsüba maparen timi aser ozüngi melaba ama inyaksü asoshi campaign agitsüba lir. Iba dak sendakba nung State Core Committee ka tentetogo aser iba luden nung sorkar department shima Election Department den yariteptsü. (Maneni tapak 12 nung...)

Angh Acharya-i ketdangsüa Puroik pur aini anir aoer

Dimapur, June 3 (TYO): Nagaland aser Arunachal Pradesh Angh, P.B. Acharya ketdangsüba nung Indian National Fellowship Centre, Mumbai-i Arunachal kübok Puroik kin nungi nisung 22 atema Educational, Emotional cum National Integration Home Stay teyari agütsür. June 4, 2017 nungi tenzükba parnok Mumbai-Goa mesüra Mumbai-Pune nung amungtsü. Iba telok ya Bomdila Forest Range Officer, Kashok Sullung lenisüba kübok lir aser kaketshir 15 dena lir, ta tanü PRO to Governor

sangdong ka nung metetdaksü. June 3, 2017 nü Raj Bhavan, Itanagar nung aliba Governor's Secretariat ketdangsertemi parnok apusoa yokba sentong ka agi. Iba mapang Arunachal Pradesh Deputy Secretary M. Damini, aser Under Secretary B. Megu nati teshimtet telok ka state maitsü tajungtiba nung sayutsü atema atyongzükba agütsü. Angh Acharya tang New Delhi nung oa lir aser paia teshimtet telok den salem lemsatep aser iba mapa ajanga North East tesem aser linük nung

tanüngba tesemtem tajungba nung sendakteptsü, ta ashi. June 7 nungi 15, 2017 tashi parnoki Upanagar Shikshan Mandal (Vidyanidhi Infotech Academy), Excel Industries and Bakery, Juhu Chowpaty & beach, Veer Savarkar Memorial, Mayor Bunglow, Sanjay Gandhi National Park, Mt. Mary Church, Aarey Milk Colony aser ISKCON temple semdangtsü aser ano Bombay Darshan tour anir aotsü, ta INFC züngsem Pooja Kamathi-i ashi. (Maneni tapak 12 nung...)

SANDONGER

Longsa Baptist Arogo nung Tsüngremer Revival adoker küm 50 ajungba Tanelar benjong

Anogo : June 9 - 11, 2017

Omen : "Onok Tanaben Asentenshijang" T. Ken 71:20

Speakers : Rev. Dr. Imchayanger & Tsüknung President IEF

Iba sentong nung Longsa senso ajak pelashishia jaoker

Sd/-

Süpongchiten, Pastor
Longsa Baptist Arogo,

Phek nung ita ka piyong süngdong atemba sentong tenzükogo



June 03, 2017 nü Phek nung ita ka piyong süngdong atemba sentong, "Green Phek-Connecting with Nature" tenzükba sentong nung Phek Deputy Commissioner, Kovi Meyase den ketdangsertem aser tangartem tangokba noksa nung angur.

Dimapur, June 03 (TYO): Environment Sunday aser June Department of Environment Forest & Climate Change, Phek Forest Division aser District Administration, Phek senteper ayongzüka June 03, 2017 nü Phek nung "Green Phek-Connecting with Nature" omen nung ajemdaker ita ka piyong süngdong atemba mapatong ka tenzükogo.

Iba sentong ya Phek Deputy Commissioner, Kovi Meyase-i June 3, 2017 nü Phek nung tenzüksüogo, aser iba ya June 4 nü Green

Environment Sunday aser June 5 nü World Environment Day den sendaktepa lir.

Iba sentong ya süngdong atemba mongpu piyong Phek district nung süngdong tema arem aser alima kümzüka ayutsü nükjidong nung lir.

Sentong nung jembidang Phek DC, Kovi Meyase-i nüburttem dang iba mapatong nung amalitepa inyakba ajanga temeket aser arem kümzüka ayutsü ayongzüka.

Paisa Forest Department-i iba mapatong achaayanga tenzükba atema pelaba

lemsatep.

Iba sentong nung menden, DFO Phek Rongsenlemla Imchen-ia nüburttem dang süngdong tema yutsübatem anepalutsü atema mepishiba den külemi nüburttem dang amalitepa inyaksü ayongzüka.

Phek Town Baptist Church Pastor, Thepuchiya-i sarasademba sülen plantation programme tenzükba liasü.

Tan mongpu nung Forest department-i nüburttem aser lokti tentet balala nem süngdong 4,200 shi lema agütsüogo.

Biometric Enrolment June 5 nü tenzüksü

Mokokchung, June 03 (TYO): Tanü Sub-Divisional Officer (C), Mokokchung-i sangdong ka ajanga, June 5, 2017 nü nungi tenzükba Deputy Commissioner office, Mokokchung nung Biometric Enrolment tenzüksü, ta metetdaksüogo.

Ajisüaka technical timtem aliba ajanga tamapur apir, anogo ka nung Biometrics 35 dang enroll sütettsü, anungji tejangrartemi anepdangshia 9:00

ako matongdang P.E.C Notice Board nung tenüng zülua toktsütsü metetdaksür, ta sangdong nungsa shia lir.

Biometric enrollment atema item kuli kakettem nüngdaksü: Proof of Identity (Pan Card, Voters ID Card, Driving License, Govt. ID Card mesüra PRC), Proof of Address (Voters ID Card, Driving License, Bank Pass Book mesüra PRC), Date of Birth (Birth Certificate, Pan Card mesüra HSLC Admit Card.

ANSCU-i pelaba sangdonger

Dimapur, June 03 (TYO): Degree tatidang osang June 02, 2017 nü sangdongtetsüsa kanga meranga inyakba atema Nagaland University Vice Chancellor, Prof. Pradeshi La aser Controller of examination (COE), NU, Dr. Abemo na den Examination Branch staff ajak dang pelaba metetdaksür, ta All Nagaland College Students Union (ANCSU) Acting President, Temjennungsang Jamir aser Education Secretary, Viranu Ltu nati tanü sangdong ka nung metetdaksü.

Semester examination tembangba sülen anogo 42buba

nung iba osang sangdongba ya Nagaland University putiotsü nung tang tekaraba degree osang sangdonger asütsü, ta ANSCU-isa shia.

Nagaland University-i maneni junga inyakba aser kaketshirtem jenjang ajungtsü atema inyakba asoshi ANSCU-i pelar, ta sangdong nungsa shia lir.

Union-isa stream aser subject balala nung toppers ajanga nüma atanger aser tenüngsang agütsür, iba den külemi takok angur kaketshir ajak nem tenüngsang agütsür, ta sangdong nungsa shia lir.

Anshu Jamsenpa-i Arunachal aser Nagaland Angh ajuru



Abelen nungi ajichilen: Arunachal Pradesh aser Nagaland Angh kinüngtsü, Kavita Acharya, Angh, P.B. Acharya, Anshu Jamsenpa aser la kinüngbu, Tsering Wang nung noksa angur.

Itanagar/New Delhi, June 03 (Agencies): Arunachal Pradesh tsür, Anshu Jamsenpa, shibai anogo pongu tsüngda Mt. Everest tenem kolaki anaben tashi tuteta otsü tasen ka yanglua liasü, lai tanü New Delhi nung Arunachal Pradesh

as er Arunachal Pradesh Angh, P.B. Acharya ajurua liasü.

Anshu aser Angh na ajurutepeba senden nung Angh kinüngtsü, Kavita Acharya, Anshu kinüngbu aser All Arunachal Pradesh Mountaineering & Adventure

Sports Association Tir, Tsering Wang aser PR Assistant, D.K. Chauhan nungera liasü.

Iba mapang nung Angh aser la kinüngtsü nati la nem tenüngsang agütsüba den külemi tarutsü nunga lai inyakbatem nung takok angutsü moaja liasü.

Angh aser kinüngtsü nati, lai tenemi atuba tsütsü takok ngutetbatem ajanga Arunachal Pradesh nung dang masü saka North East aser India nung ajak nüma tangdaksür, ta ashi.

Senden nungsa la dak temelungtetba shisa tulu aliba tanela ngua parnok kanga süngmang.

Lai tenemi atuba maparen nung tayongzüka aika kokteta state aser NE dang masü saka India nung ajak nem konang nüngsang bener arutsütsü imlar, ta parnokisa ashi.

Dimapur Urban Council Chairmen Federation sangdong

Dimapur, June 03 (TYO): Dimapur Urban Council Chairmen Federation (DUCCF)-i sangdong ka ajanga, World Environment Day

anogomung, June 5 anepdang 6:00 nungi 8:00 ako tashi pepei kiyong nung nübotoke mapa inyaksü atema Colony Chairman tem aser Council dang metetdaksü.

2017-19 küm atema NMYO lenirtem shimogo



June 03, 2017 nü 2017-19 küm atema New Market Youth Organization (NMYO) ketdangpur aser lenirtem tasen shimba osang sangdongba sentong nung tangokba noksa nung angur.

Dimapur, June 03 (TYO): 2017-19 küm atema New Market Youth Organization (NMYO) ketdangpur aser lenirtem tasen shimba osang Honibarnü metetdaksüogo.

Iba dak sendakba nung NMYO nung tejenpur team-i June 10, 2017 matongdang mapa aser files agütsütsü mepishia metetdaksü.

Iba dak sendakba nung jembidang Tir tasenba, Vikholie Yiese-i youth organization tajungba akumtsü atema inyaksü nangzüka den külemi New Market colony nüburttemi amalitepa nungita yaritsü mepishia metetdaksü.

Tang tasen shimba ketdangpur aser lenirtem atema UCRC New Market Deacon,

Kruzo Rutsa-i temoatsü meshija sarasadenja liasü.

Tasenpurtem:

* **President-Vikholie Yiese**

* **Vice President -**

Stephen Neitho Solo

* **General Secretary-**

Zhaphi Kehie

* **Joint Secretary-**

Neilhoukhon Solo

* **Cultural Secretary-**

Er. Mhasivnuo Rote

* **Games & Sports Secretary-**

Sweyievikho Mekro

* **Statistical Secretary-**

Vitseituo Khezhe

* **Publicity & Information**

Secretary -

Khrieketoulie Metha

* **Finance Secretary-**

Dakho Rhezhi

* **Treasurer- Kevineinuo Rame**



Kohima, June 03, 2017: Lokti teinyaksü khuret angateta Honibarnü Vision Trinity den asür, Kekuojalie aser Vikhozo kibong züngsemtemi Kohima nung NSF Martyrs Park tesem merükteta rong nüa (painting) nübokdok mapa inyakdang tangokba noksa nung angur. Tanga osang ka nung, June 24, 2017 nü Vision Trinity-i ayongzüka state academy hall, Kohima nung kenten sentong ka akatsü. Iba kenten sentong atema Tickets ji NCL Store, Kohima, Piazza bakery, Razhu point aser Seyie gas upper PWD Colony anasa aliba Rusie Boutique nung angutsü.



Agartala, June 3 : Hokolbarnü Agartala nung Science & Technology, Earth Sciences and Environment, Forest & Climate Change Union Minister Dr Harsh Vardhan osangbenertem den jembidang tangokba noksa nung angur.

Tripura BJP-i opposition MLA tem magizüksü: Bipla Kumar



Agartala, June 03 (Agencies): Sangküm küm tetenzüklen Tripura nung state assembly election agitsü ü lia Tripura BJP Tir, Biplab Kumar Deb-i, parnok

opposition MLA shinga party nung magizüksü, ta metetdaksü.

Hopta ana tejaklen Deb-i, May 31 nü tashi nungbo opposition MLA temi BJP nung adentsü akok, ta sangdonga liasü.

Yasüng Deb-i, "MLA tem BJP nung magizüksü atema lemtetogo, kechiyong anogo atetja aliba tembangogo. Item MLA temi Left Front tamakok mengudaksütettsü. Anungji CPM anema tokteptsü atema BJP-i menden 60 prongla nung candidates shimtsü. Tripura nung taruba sorkar BJP-i

akumtsü," ta metetdaksü.

BJP nung adentsü janrar opposition MLA tem nem May 31, 2017 tashi anogo latetja liasü, ajisüaka shingaia party nung maden.

Deb-isa, tang aliba sorkar atsüngdoksü atema Left party anema BJP-i longjemnüa liasü, saka opposition MLA temi telangzüba tajung magütsü, ta ashi.

Ajisüaka longjemmer Left anema tokteptsü atema BJP-i INPT, IPFT aser tanga lenirtem den tejembidak lir, ta ashi.

Centre telemtetba anema longjemtsüla: Meghalaya CM Sangma



Mukul Sangma (File)

Shillong, June 03 (Agencies): Meghalaya Chief Minister Mukul Sangma-i shidi ka ajanga Tripura Chief Minister, Manik Sarkar dang Centre-i nashi shishilembaba aser tepsetba atema ozüing benokba anema longjemtsü asoshi mepishia teyari meshiogo.

Hokolbar aonung Sangma-i shidi ajanga Sarkar dang, Prevention of Cruelty to Animals (Regulation of Livestock Markets) Rules, 2017 ya ajanga State List, List-II nung state tem temeten anemer, aser iba nungji kiset shiruru

shishilembaba densema lir, ta ashi.

"Kisetshiruru market nung ozüingtem memelenshidang Centre-i state sorkartem den tama jemitsüla liasü," ta Sangma-i ashi.

Sangma-isa, "Centre telemtetba ya ajanga state tem temeten khenyongi agiener, anungji iba anema longjemmer nokdaksü,la," ta ashi.

"Union sorkari asen linük indang federal inyakyim alema inyaker, aser ibaji anema state sorkartemi longjemmer inyaksüla. Iba ama inyakba ya ajanga federal inyakyim nung konghitsu," ta Congress lenir, Sangma-i Tripura CM dang shidi nungji shia lir.

Centre telemtetba nungji Meghalaya nung opposition, National People's Party (NPP) aser par teloktep Bharatiya Janata Party (BJP) nata obang meputeper, kechiyong NPP-i

iba telemtetba agientsü akhanger.

Ano külen kasa onük nung Lok Sabha nung NPP nung MP, Conrad K. Sangma-ia Ato kilonser, Narendra Modi dang Environment Ministry tetuyuba agientsü atema mepishiogo.

Conrad-i shidi ka ajanga Modi dang, ozüing tasenba ajanga kiset shiruru shishilembaba nung tenokdangba aika agütsür, koba ajanga loktiliba aser nisung aika rongsenkettsüing nung kongshitsu, talisa aluyimba aser industrial sectors nung kongshitsu, ta metetdaksü.

May 23, 2017 nü Ministry of Environment and Forests-i Prevention of Cruelty to Animals (Regulation of Livestock Markets) Rules, 2017 sangdonga liasü, aser iba ozüing ya ajanga linük tesem ajaklen shiruru ayokba market tem nung nashi ayokba nokdang.

ISIS puri Assam nung chemical amshia amaktsü akok

Guwahati, June 3 (Agencies): ISI kiralongrartemi Assam amaktsü akok ta mitkartemi tekümdangtsü agütsüba sülen Assam police-i tawa state ajunga nung kümdangshia alitsü asoshi osang agütsüogo.

Iba osang agütsüba sülen mapang tatsüka tsüingda nung central intelligence agencies-i Iraq aser Greater Syria (ISIS Islamic State of) puri linük nung Assam densema tarutsü nung 'Chlorine gas' amshia amaktsü akok, ta osang agütsü.

Iba dak sendakba nung police osang ka ajanga ashiba agi, state nung biological aser chemical gas amshia state amakba den raratsü asoshi state renema lir.

Taoba mapang nung ISIS pur 'chemical weapon' tem bushisüngdangba nung tejakleni oa kidang yangluba chlorine aser mustard gas amshia tepokertem aika aliba tesemtem nung tendangba osang agüja liasü. Iba maparen ya Saddam

Hussein kübok 'weapon programme' nung shilem agir Iraq nung scientist tem aser bendanglen nungi mongintem sentepa akümba chemical weapon bushisüngdangba telok kati achaayanga inyak.

ADGP, SB Pallab Bhattacharya-i ashiba agi, Jamaat ul Mujahideen (JMB) pur samara alirtem bushiba tali akangshioigo aser kasa telok nungi züingsem 52 bo tang tashi nung pua lir.

Myanmar aser Bangladesh nung kiralongrartem tesep aser parnok senzüba lenmangtem India nungeri bushitetogo, ta Bhattacharya-i shisem.

Chlorine gas amshiba ajanga tango sashiba nung timtem agütsür iba den külemi chlorine gas amshiba ajanga adokdaksüba tamaittsü tem rongnung mangmangba, saksüba mesera tekolak menüdaksüba densema lir.

Assam nung küm ana tsüingda nung 'jehadis' tem 50 dak tali puogo.



Imphal, June 3: Honibarnü manipur kübok Moreh jila nung bomb tesashi ka poka nisung asem yiru, ta police-i metetdaksü. Iba bomb ya nikongtsütsü 2:30 shi nung apok. Anogo isheka tejakdanga kasa jila nung bomb ka poka tetsür ka tepsetogo.

Arunachal CM Union Minister Manoj Sinha den ajurutep

Itanagar, June 3 (Agencies): Arunachal Pradesh Chief Minister Pema Khandu-i Arunachal nung 'telecom connectivity' dak sendakba nung ken o lemteptsü asoshi Union Minister Manoj Sinha den New Delhi nung ajurutepogo.

Khandu-i Yashi Union Minister of State for Communications den ajurutepdang, par state e-governance aser m-governance nung kanga temolung agüja inyakba metetdaksüba den külemi 'microwave towers' aser 'VSATs' densema 'optical fibre connectivity (OFC)' amnoktsü asoshi nungdakba lemsatep, ta osang ka ajanga tanü metetdaksü.

Pai maneni tang aliba IT network dak temolung alemtsü maliba lemsatepa liasü aser iba den külemi state nung GST mapa küma inyaka aotsü atema OFC network tajung nungdakba shisem.

GST takok ngua inyaka aotsü atema BSNL broadband, internet leased line (ILL) mesüra VSAT tongtibangsa nungdakba tesem 144 bushitetogo, ta Khandu-sa ashi.

Ajisüaka tesem 61 nungbo broadband mesera ILL exchange maliba aser tanungba tesemtema yanglushitsu nungdakba pai metetdaksü.

Chief minister-i maneni district shia nung 'RailTe'l maparen balala asadangtsü asoshi nisung anana bosa agütsütsü asoshi mepeshi.

Union minister-i Khandu dang state nung 'telecom connectivity' akangshia yanglutsü asoshi nangzüka liasü aser iba den külemi Centre sorkari kibong shia nung 2-20 mbps bandwidth agütsütsü nükjidong nung BharatNet project kübok gram panchayat lakh 2.5 sendaktepdaksütsü asoshi nükjidong aliba metetdaksü.



Guwahati, June 3: Honibarnü Guwahati nungi km 56 shi pilar aliba Goreswar jila nung tribal tetsürtem school-i parnok sobaliba sobutsü semer aoba noksa nung angur.



TIR YIMYIM

YIMOBILEM (EDITORIAL)

DIMAPUR SUNDAY, JUNE 04, 2017

TEMOATSÜ ARUBA

Asenok ajaki Tsüngrem nungi temoatsü aginür, ibayongji asenoki anepdang nungi aonung tashi sarasadem shia temoatsü meshir. Atangji, aginüba agi meshir aser meshira agütsütsü ta Tsüngremia nangzüka lir. Ajisüaka, asenok amangba purtemi metettsüba kaji asenok taküm dangi aruba temoatsütem ya meshiba kija agi arur masü saka Tsüngrem dang tashi angaba ajanga arur. Tetezü, meshiyonga tashi mangara magütsütsü. Aji oda, kodang asenoki Tsüngrem den tashi angaa jajadir, Pa dang asenoki moajang ta asüngdangtsü menügdaki akümer, kechiyong Pai asenok nüngdak meteta lir, anungji asenoki masüngdangdangyongi Pai asenok moatsür. Tazüngkunem 28 : 2 nung ashir, "Kibuba nü Tsüngrem ola nenoki angadi süra, item temoatsütem ajak nenok madaki arutsü aser nenok sülen anidaktsü." Iba laishiba tekong ya rasaa mashiyonga asenoki angatetter. Yangi jangratemtsü talila kaji asenoki Tsüngremi ashi angaba nung asen taküm, kibong aser lokti dangi temoatsü aruba dang masü saka temoatsü asenok sülen anidaktsü. Aiben asenoki iba ama Tsüngremer tenangzüka amadokba ajanga Tsüngrem nungi temoatsü angulen lenmang memeteti timatemer. Aji oda, Tsüngremibo asenok teti moatsünüa dang alir. Ibaji asenoki tashi angaba tanurtem meimba amai lir. Tanurtemi tashi angara tsüraburtemi parnoki memeshidangyongi parnok nüngdak reprangteta agütsür. Iba kasaji anogo shia asenok taküm nung Tsüngremer temoatsüji meimlaba mapang nung meimlaba nisung nungi arutsü. Tsüngrem dang tashi angaba amangba purtem taküm aser kibong nung iba ama temoatsü anguba aiben ajangshir alitsü. Asenok jashia alidang meimlai ka medemerr kar asenok mulung süngzüksütsü arutsüa akok, tamakok nung alidang meimlaba nungi teimla angutsüa akok, senotsü nüngdaka alidang meimlaba lenmang kar nungi teyari angutsüa akok. Iba amaji asenoki Tsüngrem dang tashi angaba ajanga asen dangi temoatsü angubaji asenokibo mangatettsü aser mezüngdangmatsü. Ajisüaka, asenoki aiben asenok nüngdak dang tali asenoki aginüba ajunga angubajiang temoatsü amai bilemer. Iba jagi aiben asenoki tashiyim agi mesüra ochimashi lenmang tapu balala nungi 'adjust' süa temoatsü bushir. Ajisüaka, asenoki anguba rongsen ajakbo temoatsü masü. Temoatsü o rongsen na ya balala. Temoatsü ajak rongsen saka rongsen ajakbo temoatsü masütsüa akok. Aji oda, asenoki temoatsü arulen lenmang junga mangateti rongsen agi temoatsü kümdaktsür bushira, ashiko asenoki anguba rongsenji temoatsü masü lendongang asütsüa akok. Ibaji bilemdangtsü atema tanü yangi asenok den iba Tsüngrem o ya lemsateper. Aji oda, kodang asenoki temoatsü ya Tsüngrem dang meshiba agi masü saka tashi angaba agi arur ta angteta lidir, temoatsüji asen kija dangi masü saka asen chirnur, asen adianu aser telok dangi arur aser itemji senmang küma moatsür. Asenoki aiben Solomon chuba akaba indang jembir, ajisüaka pa akabaji tebu David-i tashi angaba ajanga pa nem maotsüba temoatsütem liasü. Aji oda, Tsüngremi Abraham dang pai tashi angaba ajanga alima nung kin tulu küma moatsütsü nangzüka indang Lipok 12 nung shia angur. Tanü yangi asenok den lemsatepba ama asenoki Tsüngrem temoatsü arulen angatetra, asenoki Tsüngrem dang temoatsü meshia sarasademtsüba dang nungibo Pa tashi angatsübjiang tongtibangba ta angatettsü. Aji oda, Tsüngrem dang temoatsü meshiba dang nungibo Pai agütsüba temoatsütem züngdanga pa tenüng sanga Pai ashi angaa ali tajungba ta asenoki tali tajungba angatettsü. Atangji, tanü putu ya rongsen bushiba putu lir. Ajisüaka, Tsüngrem ashi mangai rongsen bushiba nung lendong timtem aser takoksa lir ta angatetdi. Tsüngremi ashi manga inyakba nungi anguba rongsenji kodanga asenok chirnurtem asoshi senmang küma renloka maotsü ta asenoki angatetdi. " Tsüngrem dak dang amanga tajung inyakang, aji süra ali nung tasoshia alitsü," ta Tenüngsang Ken 37:3 nung ashir. Tetezü Tsüngremi mulungba ama tashi angaa tajung inyakbaji dang asenok alima nung tasoshia jangratema alitsü asoshi temmoatsü arulen lenmang lir.

OLEMSABANG

JUNGER NII !!!! LANLIA !!!!

- T. Imo Jamir, Changtongya Yimtiba.

Tawato Mokokchungi atudang Ao-o nung adokba kaket kar alia azüngtsü atema ABAM Book-stall-i oa asen Aor Aotsürtemi züluba kaket ishika agizüker lushia züngdang. Mapang tatsüka nung Ao-o nung adokba kaket ishika rongnung ni kaket ana shimtet

1. ISREAL OTSÜ ... Rev.A.Temjen Ao.
2. NAGA YIMTEN WADANG ... Kibangwar Jamir.

Tsürapur Rev.A.Temjen.Ao shiba asen Aor Laishir rongnung Tejen Lai Putishir ka liasu pai züluba ISRAEL NUNGER OTSÜ kaket mapang balala nung adokba kaket tilala ishika arokoteper kaket ka küma atokba kaket tenüngji "ISRAEL OTSÜ" ta sür adoka lir. Yamala kaket tezülur kati züluba benteper kaket ka küma atoktetbaji kanga junger, kechiaser nüngdak mapang tejen kaket ana/asem bushitsübjaji mapati saka kaket ka aliba jagi ajak peridaktsür. Asen Aor Aotsüri züluba kaket aika rongnung tangazüktsü aketba aser jangratema otsü atongteper ama azüngbaji Lai Putishir Dr,Rev.I.Ben.Wati-i züluba kakettem ta shitet. Pai züluba kakettem ni metetba tashibo alia züngogo, pa ano taküm junga ali asübo tanüa pai züluba kaket tasen-tasen alia zünga lila ta sasaa bilemer. Pa meliaka pai zülua toktsüba kakettem azüngdang pa bilemteter. Dr.Rev.I.Ben Wati-i züluba kakettem to arokoteba adianu kinunger kari anepalua kaket tuluka kümer atoktet asübo kangasa jungla. Pai züluba ockettem magazine aser bulletin balala nung adokbatembo mependenmatsü südi. Aji oda kaket ajakto benteper kaket ka küma atoktet asubo kaket azüngertem atema pa taküm ali ama ken asentenshia temoatsü ngula, kechiaser pai züluba keket nung tagitsü aikasa zülüoka lir.

Odila KIBANGWAR JAMIR (Chuchuyimpang)-i züluba kaket, "NAGA YIMTEN WADANG" ya kangasa apensaa zülüogo ta azünger. Iba kaket tereprangtsübo apuapur tilaka dang saka iba kaket nung tagitsübo nangtena lir. Nagalima yimten nung ataloka arubatem ajak meteta aser angashia liaka item tatalokbatem kodang, koba tesem nung atalok aser shir tendak atalok ibala ajakbo jangjaa metetet liasüba, iba kaket nung tatalokbatem kata mezütoki tatongi tejangja zülua aliba jagi otsütemji tejangja metetba dang masü saka yasüra onük aika nung amshitetba kaket ka ta shitet.

"KILANGJANGPOK TOM NUNG POKTET AMA" Odila Kibangwar atura tashikawa tepiyong Sorkar tenzüka nung lia arur tang anisüngzüka mapang kecha mebilemi lia iba ama tabensa kaket zülua nuortem nem züngdaktsüba atema kanga pelar ta shisemer. Naga nunger yimten wadang, tebilemstü, khuret aser teinyaktsü nung ajemdaker züluba kaket aikasa züngdangogo saka itemla kaket teimbaka kaket züluri pa atenba telok, pai saklokba telok aser pa sentaktepa aliba teloki inyakbalenang janga züluba angutsü. Item kaket jagi nübortem tzüraba aser taginüba tzüratema mataloktsür, oda kaketji züngazünga tezüang tangdaktsür saka koba kaket KIBANGWAR-I züluba lir, iba kaket alia azüngba ajanga asen Naga nunger libaliroa aruba aser yimten nung tatalokbatem ajak tejangja metettsü. Ajaki iba kaket alia azüngtsü ayongzüker. Oda nai mezüngnura tejangrar kar nem alia züngdang. Iba kaket ya shinga luja masü mesüra tujaa masü aser kaket nungji nangloknangra kecha inoksema mali saka indang-indanga kechisa atalok akata mezütoki züluba kaket lir. Yimten(Political) nung ajemdaker züluba kaket iba ama teindang kaket aikabo mangutsü.

Tanabena ken lepshir, Dr.Rev.I.Ben Wati-i züluba kakettem nung akhi tsürapur libaliroa aruba aser Ao kaket ken-o puti aika zülua alinung kinunger adianu kari kakettemji arokotena kaket tuluka küma pai koma zülua ali (original script) ajioda atoktet asübo koda jungla. Pai züluba kakettem kodang züngdir züngazünga kaket azünger ama masü saka pa den asetteba mener otsü atonger ama ang yimdangi arur.

Dr.Rev.I.Ben Wati-i temalen züluba kaket ishika nung tasüngdangba kar züngshi saka tanü tashi iba telangzüba shingaia züluba mangur, anungji nia kanga metetnü nung yangia ken lepshir :

1. Akhi longsowa nungi asen tsürapurtemi "AO YIM SEMER-NA" ta jembia aru, sura item yim semerji koyimer sa asütsü amai ?
2. American Missionary-tem asen limai marudang Aor tenüng "ZÜLU" ta amshia ajaba karbo liasü asü mali asü ? Tat:Temjenzülu, Kikumzülu, Imtizülu, Lemdongzülu, Merenzülu, Imrongzülu, Zülüjiba, Zülutemba, Zülüangla, Zülumongla, Zülutoshi amala.... (ZÜLU ta asüba olong ya Ao o tasen asü, tejen ta metetnürba ako....)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

SÜNGDONGJI KECHI'AR SÜNGJANG AGI SAYUTSÜ.

- L.Kika Pongener, Aoyimkü, Dimapur.

(Taoba adok nungi...)

Asenok iba alima nung teti alitsüba yok masü, arishi anogo mapang tatsüka alidang sadok-sadoka pelaa linura, asenoki ochishia lidi, mapa tajung inyakdi, aser ajak dak alaka, nisüng ajak den yimjung nung lidi. Aji oda, litetra asen dak nungi chirnur aser semchisemnur tajung jakzüksü, aser asenok alima nung parnok maongka aser parnok aküm nung, taso-a shizüka jangratema alitsü.

Iba lima nungbo shirnoki nüngsen metsübui ochiba dang ochi-a ta, tanak dang tanak, temesüng dang temesüng, shidakba dang shidak aser taiba dang tai-a shidir parnokji tarishir aser tesempar jenti alitsü, parnok anema apusor aika dang alitsü. Ajisüaka shirnoki tai dang tai-a ta meshiteter, mesüra yabo meshidak-a ta reprangtetyongjia meshitak-a ta meshiteter, tai-a ta aser meshidak-a ta angateter sernung odang metetsümonga-ka ola madoki toktsür, item nisüngji tarishir aser tesempar shinga malitsü, yamala nisüngji dang lokti tenzükba mapa ajunga nung tenzükdaksünutsü. Ajisüaka shiba südir süang, alima nung asenok taküm aliba aser asenok lokti nung tenzükba, asenok nokdakba aser tenzükba jenjangmong kabo lia alitsüba aser tenzüksü kangasa tongtipang lir. Nisüngi aitsüa sempaa arishi-aka, mesen-metoea mezüngmeshi-aka, aser anema apuso-aka, Tsüngrem tsüngdang medena lira aji agi teperi. A.Shin-28:23. "Temeli agi mesüzüka nanga jembir dang nungi nisüng arütsüri tesülen maongka tali angutsü." Nisüng aikati majung sernung junger ta o tanang agi mesüzüka sanga jembia tangar ashiochtsür, saka itemji Tsüngrem tsüngdang sentsüh tulu asütsü, ajisüaka shirnoki indang-indanga majungba dangbo majunga ta ochishia shiteter, parnokji Tsüngrem nungi maongka tali angutsü.

Aiben asenok meimchiribo nisunger tashitemetet aküm tulu dak rangloker, aser tai-a ta metetsümong-aka itemji tsübuba agi ola madokteter, aser ochi-a ta metetsümong-aka nisunger tejak repranger senzüka toktsür. Anungji asenoki teti nisunger aküm aser tashi nung masü, saka Tsüngrem tsüngdang ochiba nung nokdaksü aser tenzüksü kanga tongtipang lir. A.Shin-10:3. "Kibubai ochishir yaseta metoktsür".

Tsüngremi shirnoki ochishia indang-indanga alir parnokji kodanga yaseta metoktsür. A.Shin-10:6. "Ochishir kolak manung temoatsütem lir". Shirnoki ochishia taküm junga alir parnok sülen teti temoatsütem anidaksü, parnok madak teti temoatsü alitsü. T.Ken-37:25. "Temeshipur senzüka yutsüba ni mangu; mesüra pei chirtem meshimetsüba ni mangu". Asenoki Tsüngrem tsüngken tsübua pai mulongba lenmang nung jaja-a taküm meshiteta ochishia lira asen dak nungi jakzükba chirnur aser semchisemnurtem Tsüngremi kodanga senzüka meyutsütsü aser meshimetsüa metoktsütsü.

Temeim amangbapur tajungtem, asenoki o agi aseni inyakba aser asen ajungba indang aika meshi-aka, aser asen sasa asen temeden o aika mejembi-aka asen chirnur jala-jabaso agi asenji kechi'ar sayutsü, asenok taküm koda lia aru ajakji parnok sayutsü, kechiyong asen jala jabasotemji asen noksa lir. Anungji asenok dak nungi süngjang tajung alimai ongzüka achitsüsa, asenok taküm junga alitsü merangdi. Süngdongji kechi'ar süngjang agi sayutsü, na aser ni koma lia aru aji asen chirnurtem aser semchisemnurtem sayutsü. Anungji asenok taküm libaliro aser jaklaliro junga kümdanga azüoka alitsü kanga tongtipang lir.

Tsüngremi iba o agi tazüngertem ajak moajangma.

Eritrea nung Khristan 100 jungnüa apu

Washington, June 2 (Agencies): Alima nung Khristantem kanga reshikangshiba linük jenjang 10 buba nung Eritrea linük lir ta Open Doors indang World Watch List nung metetdakja lir.

Taoba ita Eritrea sorkari Khristan 100 jungnüa apu. Eritrea linük nung tamangba yimsü telemsa pezü dang agizüka lir aser tanungba tamangba yimsütem anema sorkari mapa inyaker.

"Eritrea nung tamangba yimsü indang nüjiso lir ama tema nungbo sayur. Parnoki tamangba yimsü denomination kar dang yimjak nung adenshitsu melar. Iba linük nung Orthodox arogotembo

talenba kecha mali. Ajisüaka, sorkari denomination pezü dang agizüker aser tanungba denomination tembo parnok memelar. Item denomination tem nung züngsemtemi kidang dang adenshia sentep agibajia ozüng alema inyakba mapa ka ta züngshir" ta Open Doors USA ketdangser Emily Fuentes-i ashi.

Eritrea linük nung amangtsü melaba denomination temji Sunni Islam, Orthodox Christian, Catholic Christian aser Evangelical Lutheran tem dang lir.

Eritrea ya Africa anüdoklen tsütsü lir aser kanga tatsük lir, saka ketdangsertemi tamangertem apuba sülen

storage container tepuokdak ayur aser iba nung nisungtemi tangoa junga mesashiteta timtemer, ta Fuentes-isa ashi.

"Parnok shiranger aser chiyungtsü shidak mangur. Iba linük nung tanga Khristantem kanga timtemer" ta laisa shisem.

Alima nung Khristan temi Eritrea nung külem tamangertem atema sarasademtsüba dang masü saka alima tesem balala nung tamangba telok tilatem reshikangshi ajuruba anema mapa inyaksü asoshi US President Trump dang International Religious Freedom (Ambassador)-at-Large ka shimang ta tezüluba nung sign süang, ta Fuentes-ia ayongzük.

ANOGO ABEN TSÜNGREM DEN

AMMANG TASHIOKTSÜBA. YOHAN 18:1-14

Asen Kibuba nütüng ka ajanga ashiochtsü, "Ter ana rongnung kati." Lendongji kibong züngsem rongnung kati agütsü. Alimai mapa tamajung inyaksü asoshi tembar anioker. Anungji asenok Yisu den tembar küma alibaji timtem asütsü akok; asenok den metettepa alirji asenok asoshi tatidangba asütsü akok timba nung alima tembar ta nangzüka alir dang nungi ka telung tebilemba jiang tamajungbai agiener. Tsüngrem yimli nung ni kechi inyaker? Kü dak temulung alemer asü? Mesüra ni tamajungba tasa nungi alir?

Asen Master sarasadem tsüki nung ashiochtsü. Temeshitiba meta nung tashiochtsüri memeshiba tebang mesep agütsü. Pai pa Memerükba alimai metetta aliba temeshidaki bener aru. Anungji yamaji kü dena alitsü akok. Ni tenla kidang memeshiba mi aputsü akok. Ni temokok agi apudaker Kibuba dak kotari agi atsüngtsü akok. Ni bendanga agütsüba sübuttsü sobur tamang tashi amshitsü akok. Aser iba "Tamang tashiochtsüba" ya sen asoshi liasü! Sentsüwangshi Kibuba sen tatsük semer yong ayok! Aser Yihuda aser nisung aika tetsüngdaji parnok aiben Kibuba tajemba jenjang yong ayoker!

Rongsen tashi, aser iba lar mungui ni tenük poker aliba nungi, Kibuba, ni kümzükang

Benny Hinn aser Chris Oyakhilomei nati TV Channel tasen ka tenzüksü



Benny Hinn aser Chris Oyakhilome

New York, June 3 (Agencies): Benny Hinn Ministries nungi televangelist Benny Hinn den Nigeria Pastor Chris Oyakhilome nati TV channel tasen ka sayatsü ta metetdaksüogo.

Oyakhilome ya Believers' LoveWorld nung tir lir aser Hinn tenati ashiba agi, iba channel nung sayatenyatem aser Tsüngrem indang sentsüwangshi sayatsü.

Iba channel dang "LoveWorld USA" ta ajatsü aser United State nung Spectrum cable ajanga sayatsü, ta CBN News-i Hokolbarnü sangoktsü.

Oyakhilome aser Hinn nati taoba hopta channel tasen sayatsü indang osang metetdakja liasü. Iba mapang Believers' LoveWorld lennir Oyakhilome-i, "tanü asenok tatem anogotem nung alir aser Yisu Khrista tanaben marudang channel tasen ajanga Tsüngrem sentsüwangshi sayatsü," ta ashi.

Oyakhilome-isa Facebook video ka nung channel tasenba nungji Temeshi Tanüla indang tashi dak tongti süa sayatsü.

Hinn-ia alima tesem balala nung miracle crusade tem

ayongzüka agir aser pai ashiba agi, 'onoki iba ya tezü atangba channel ka mesüdaksünür, saka iba channel nung tesüngmangtsü, sayatenyatem ajanga Tsüngrem tashi sayünür."

Pastor Deola Phillips-ia channel tasen indang jembidang, iba channel nung Benny Hinn indang "This Is Your Day" aser Chris Oyakhilome indang "Atmosphere of Miracles" sentongtem adentsü.

"Tsüngrem indang tashiji anogoshia sayatsü aser iba nung shirangertem atema sarasademba sentong alitsü. Tsüngrem adenbaji TV ajanga metetsü aser nü tenüki ngua sayatenyatem ataloktsü" ta Phillips-isa ashi.

Iba channel nung o jembirtem rongnung Christian speakers-i Kenneth Copeland, Rod Parsley, Marilyn Hickey aser Apostle Guillermo Maldonado nungertem asütsü.

"LoveWorldUSA" channel ya July ita sayatsü aser iba channel nung Khristan osangtem, tanurtem sentong aser Khristan mungdangtem adentsü.

OLONG PAITEP # 4440

		1		2					3	
	4		5						6	
		7								
									8	
		9		10		11	12			
		13								
	14					15				
16										
			17			18				
19						20				
			21							

TIPIEN

- 2. Kaket nung telesma - (4)
- 4. ____ tang - (4)
- 6. Le ____ g - (3)
- 7. Tanemi jembi - (6)
- 8. Tetsungda / Tiyong - (3)
- 9. Nübo - (3)
- 11. T ____ tiba - (4)
- 13. Taruba kum - (7)
- 14. Aika masü - (4)
- 15. Khen atema meshia ata - (3)
- 16. Arem shirurutem kazüdak - (3)
- 17. Kecha taa magi - (6)
- 19. Tsük ayudak - (3)
- 20. Kilung masü - (4)
- 21. Osangzülur tebilemba lemsaba - (4)

LANGTSÜNGLEN

- 1. Tawa / Tang - (3)
- 2. Shitak - (3)
- 3. Y ____ sü - (5)
- 5. Medemer tajung - (6)
- 8. Temerang masü - (4)
- 9. ____ -tsüset - (4)
- 10. Talang nung masü - (3)
- 11. Lir/kar - (3)
- 12. Tetsür teberem sü - (6)
- 14. Ati / Mapang melenshi - (5)
- 18. Ghonda - (3)


OLONG PAITEP # 4439 TELANGZÜBA

TIPIEN :

- 2. Atsük, 4. Tenya, 7. Aju,
- 9. Anogo, 10. Ayang, 11. Jilia,
- 13. Ako, 14. Kimen, 15. Tzura.

LANGTSÜNGLEN :

- 1. Meshi, 3. Tajang, 5. Yongya,
- 6. Bangjem, 8. Atongok, 9. Anüshi,
- 10. Ainkar, 12. Yimer.



TEBUI ALOKBA YIMYA REPRANGER:

Hi!!!! Alokba...
Telephone
ring arua
na??? Nibo
kecha
mangashi
atu!!!

Oba, ya na.... kü
medemtsür kari
urgent call ka
arunungbo ta ser
amer angaa
atar ati!!!!



TANÜBO NAI LANGZÜANG

Q. 2017 India Mobile Congress (IMC) September 27-29 tashi alitsü, süra iba sentong koba yimti nung akatsü ?

- [A] Chennai [B] Kolkata
- [C] New Delhi [D] Pune

(Taruba adok nung onoki langzüsü)

YASHI ADOK TELANGZÜBA : Tapan Ray

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimym bureau tom nung agüjang.

1. Tenüng : _____

2. Tasoba anogo: _____

3. Küm : _____ 4. Class : _____


5. School : _____

6. Talidak : _____

7. Salem osang : _____

NAIA YA METETER MA

ICC ODI RANKINGS TOP 10 NUNG VIRAT KOHLI ZÜNGSEMOGO



India nungeri cricket kanga sapua asayateper, aji oda süaka tawa International Cricket Council-i One Day International asaya nung asayar (Batting) tajungtiba 10 shimtetba rongnung India nungibo Virat Kohli ang jenjang asempuba nung züngsemogo.

Mezüngbuba jenjang nung South Africa nunger De Villiers (874), tanabuba Australia nunger David Warner (871) aser tasembuba jenjang nung India nunger Kohli (852) lir.

Rohit Sharma 12buba, MS Dhoni 13buba aser Shikhar Dhawan 15buba ta top 20 tashi nung ang züngsemer. Kasa jenjang nung South Africa aser England nung asayar pezüzü New Zealand nung asem Australia aser Pakistan nung anana ta züngsemogo.

Ano, ball aoner rongnunga India nunger top 10 rongnung shinga shimtettsüsa asayar maliasü. Top 20 nunga Axar Patel-i jenjang 11buba ang ngutet.

SUDOKU # 3553

1			6			8			
					2	3			
	7	5			4				
			9	4		5			
5	2		3			9			
9	4	6	1	2		3	8		
				7	9	6	8	4	
7			8			5	3		
						9	1		

TELANGZÜBA # 3552

1	4	8	3	5	7	6	2	9
3	9	6	8	4	2	5	1	7
2	7	5	1	9	6	3	4	8
9	6	1	7	8	4	2	5	3
5	8	2	6	3	9	4	7	1
4	3	7	5	2	1	9	8	6
6	5	4	9	1	8	7	3	2
7	1	3	2	6	5	8	9	4
8	2	9	4	7	3	1	6	5

OJANG LUTEP # 4048

- LANAGAND :
- NGNU :
- OKJO :
- ANGKIDER :
- ERYIM :
- TONZÜKG :
- HITETSÜKCPTSÜ :
- NGMAPA :
- GATON :
- URAR :

OJANG LUTEP TELANGZÜBA # 4047

NISUNG AIKATI TIMTEM TOUSHI AJURUBA MAPANG NUNG ANG TSÜNGREM BILEMTETER

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnok ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



Aries
21/3-19/4

Tangar den nai tesendaktep yanglutsü asoshi tanü ya anogo tajung lir. Nai aginüba tem tangari angatettsü südi.



Taurus
20/4-20/5

Nai lokdi nung shilem agitsü mejangratsü akok, saka nisung aikati tanü nü den sensaksem alitsü aser nai parnok mesendoktsüla.



Gemini
21/5-20/6

Tanübo nai tangar den jembishinüba nung nai bilemba ama madaloktsü südi. Nai tezü metangi liang aser mapang tajung ataang.



Cancer
21/6-7

Tanü nai mangatettep kar ajurutsü südi. Anungji tanü tangari ashiba nung nai anidakra nü anogo tajung asütsü.



Leo
23/7-22/8

Nai ajangshia aruba mapatem mesüra nai jembiba o tem shisadangang. Iba ajanga tanü nai dangar den jembishinüba nung azüoktsü südi.



Virgo
23/8-22/9

Tanü nisung kari menüngdakba o tem nüden kanga jembitsü. Anungji nai mapang tajung alangzükünura item nisungtem paidokang.



Libra
23/9-22/10

Tanü nai medemertem den kazüang, saka nai parnok den mapang tali indokra mangatettep adoktsü. Anungji mapang junga amshiang.



Scorpio
23/10-21/11

Tanü nai akok tashi tangar den o mejembitsü merangang. Tanü tila teri nungi mangatettep adoktsü ana nung lir.



Sagittarius
22/11-21/12

Tanü nai o kanga mejembie tangari ashiba o angatsü merangang. Tanü nai lokdi den tesendaktep yanglutsü tasak asütsü.



Capricorn
22/12-19/1

Tanü nai medemertem den o tali jembiba ajanga mangatettep adoktsü südi. Nai kanga junga shisadanger jembitsüla.



Aquarius
20/1-18/2

Nai tangar den sensaksem kanga linütsü. Saka nai jembiba o tem agi tangar temolung meyrutsüsa bilemdanger jembiang.




Pisces
19/2-20/3

Tanü nai tangar angatettsü merangang, aser iba ajanga nisung aika peladaktsütsü. Nai kokra nisung kar mapa nung yaritepang. Nikongdang 5:00 ako nungi 7:00 ako mapangji na asoshi tajungtiba asütsü.

TEMANG ANEMALIBAREN

ASENTZÜ SENDOKBA AJANGA TAJANGZÜK KAR

Asen temang nungi asentzü sendokba ajanga temang temperature azüoker. "Asentzü asenba tongti nukjiodongji asen temang mokonga kümdaktsütsü atema lir." Asentzü indang 'glands' ajanga teküp nungi asentzü adokdaktsür, aser ibaji ajanga asen temang telung nung temperature ajema kümdaktsüba nung yarir.



1. Asentzü sendokba ajanga zübo/tarak aneptsür. Teküp nung 'eccrine sweat glands' million aika lir, aser iba nungjagi asentzü sendokdang 'toxins' (miim), metzü, cholesterol aser alcohol dena indoker. Asentzü sendoka mapa inyakba ajanga azü jajaba tezü dangbanger aliba merüktettsür.
2. Asentzü sendokba ya 'antibiotic' ka mesüka lir. Asen temang nung rangsaba aser merla agi metepba ama tilateri taraktemji asentzü nung keta 'dermcidin' ajanga aneptsür.
3. Research ajanga bushitetba agi, mapang shia asentzü sendoka exercise agiba den külemi tzü peria ajemertemi tezüngjang nung long kümtetba azüokteter. Exercise agidang asentzü sendokba ajanga temangi tzü akhanger/meshir, koba ajanga tzü jema tezüngjang merükteter.
4. Asentzü sendokba ajanga asen temang nung ayangashiba ajema kümdaktsür. Exercise agia asentzü sendokba ajanga tekolok nung 'neurochemical pathways' junga kümdaktsür, aser ibaji ajanga endorphins adokdakja asen temang nung 'painkillers' ama mapa inyaker.

(Source - Internet)

Q. Central government-i Nagaland nung nashi maleptsü aser shibelen mesüdaktsütsü asoshi army nem tashi agütsü nunga koma süla ?

Asen Nagaland lima nung nashi maleptsü, shibelen masütsü menokdangyonga, kidanger state nungi nashi marura asen Nagalima nung nashi mangutsü.

-SMS

Nashiji tangalen nungi marura, pei lushi, yim, distrist, state nung pei achitsü metsütsü. Anungji obou/oba nungeri aji sayu. Kecha army-a ta aleptsü, maleptsü ta khuret tagütsü.

-SMS

Ali pokli nungi chia-jema aruba chiyongtsü nokdangra tensa jungrarabo masütsü akok.

-Dw Jamir

Ajak dang temaba aser tulubaji Khristantemi amangba Yisu dak temaba kecha mali. Central govt-a army-a aser alima ozüng ajak Pa kübok lir. Anungji kecha tsübuttsü mali ABAM-i ayongzükbaji dang nübertemi tashi anga inyaksüla ta nibo bilemer.

-R. Wati

Army nem tashi agütsü nungbo Naga nunger o Muslim nunger na külen, army külen ta nashi alepa nok agi tang leptep tenzükla ati. Aji ang jangratemtsüka süla ati.

-SMS

Centre-i latetba ozüngji kanga junger. Kechiba süra shiruru mesenmetui mamshitsü atema, saka asen Naga nunger asoshi shi ya kangasa tongtipang chiyongtsü ka asünung, asen Naga nungersa timtemtsü.

-SMS

Centre nungi nashiji melepdaktsütsü tashi agütsütsü chance lir. Census record nung tsümar teimba lir. Subsidy tapu jenti arubabo memeteter saka ozüng aruba agibo Naga nungersa kangshitsü.

-SMS

Army nem tashi magütsü yonga Assam gate nung Hindu nunger Army kar junga amen nung ajungtsü.

-tiriyim webmail

Army tulurtem Nagaland posting asoshi rakteptsü kechiaser Naga nungeri nashishi machi maremtsü. Anungji gate tem nung miima sen agütsütsüji Army pocket money asoshi Nagaland gate temji income generating gate asütsü.

-tiriyim webmail

TAN HOPTA ATEMA - KOMA SÜLA ?

Q. Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Olong 20 shi nung June 09, 2017 tashi nung iba telangzüba ya onok dangi e-mail - tiriyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.



Miss Nepal World 2017 akokla Nikita Chandak (tabelen nungi tanabuba), Miss Nepal Earth 2017 Rojina Shrestha (tebelen mezüngbuba), Miss Nepal International 2017 Niti Shah (tachichi nungi tanabuba) aser Miss Nepal Asia Pacific International 2017 Sahara Basnet nunger Kathmandu nung Miss Nepal 2017 beauty pageant final mapang tangokba noksa nung angur.

Kü taküm otsü film yanglutsü metemsü: Dharmendra



Dharmendra (File)

New Delhi, June 3 (Agencies): Hokolbarnü Actor tejen Dharmendra-i ashiba agi, pa taküm otsü nung ajemdaker film yanglutsübjji pai anemer aser pa taküm otsü bushidanga film yanglutsü asoshi kodanga temelaba magütsüsü. "Ni kodanga parnok nem kü taküm otsü meyagludaktsüsü," ta pai osangbenertem dang ashi. Iba onük nung sendaka kechiba pa taküm otsü film

meyagludaktsüner ta asüngdang dang pai ashiba agi. "Kü taküm otsü film yanglutsü asoshi malang. Ajisaka ni kü taküm otsü shilem shilem tanga lenmang len nungi ashitsü."

Arishi küm 81 tain Dharmendra-i ashiba agi, pai pa taküm otsü kakat dena zülutsüba kecha tebilemba mali.

Actor tejen ya yakta film industry nung shilem agir küm 60 ajungtsü, pai iba mapang nung movie tajung aika nung shilem agia nüburttem jangratemdaktsüogo. Pai shilem agi film tem rongnung; "Bandini", "Satyakam", "Raja Jani", "Pratigya", "Sholay" aser "Chupke Chupke" nunger lir.

Tawa pai shilem agiba film tem rongnung "Apne" aser "Yamla Pagla Deewana" nunger lir. Tang actor ya pa indang mezüngbuba international film "Dream Catcher" nung shilem mazüngi agidar. Iba film ya Australia

nung amener aliba producer Rishi Raj Films aser Kinopticon Productions den longjemer inyakba Indo-Australian project ka lir.

Iba film otsü ya temeimteper otsü ka lir aser iba tesendaktep nung techonology ajanga shilem agiba dak tali rangloker inyaker.

Maneni iba film nung Pooja Priyanka aser Australia nunger actor Travis Jeffery natia tongti shilem agir. Film otsü ya Rahul B. Seth zülu aser Santoshh Shivamm-i direct asür.

Dharmendra-i taoba mapang nung pa kinungtsü Hema Malini den "Seeta Aur Geeta", "Sholay" aser "Dream Girl" nung külemi shilem agia liasü.

Tena kibong akümba sülen "Alibaba aur 40 Chor", "Baghawat", "Samraat", aser "Razia Sultan" film nunger nung külemi shilem agi.

Pai ashiba agi, film nung shilem tajung kar ajanga dang tena külemi shilem agitetsü.

LG Electronics Pay Mobile Payment amenokogo



June 3, 2017 (Agencies): Samsung company, South Korean bank asem den Artificial Intelligence (AI)-based services atema longjemtsü asoshi merangba mapang ka nung LG Electronics Inc-i "Samsung Pay" den tokteptsü asoshi Linük nung hokolbarnü parnok indang 'mobile payment tool' ka anemokogo.

LG Electronics compang ajanga ashiba agi, "LG Pay" ya 'Wireless Magnetic Communication technology' ka lir aser iba ajanga iba app amshirtemi parnok smartphone nung 'credit card devices'

ajanga shishilembatetsü, ta osang ka ajanga metetdaktüsü. "Samsung Pay" nunga Magnetic Secure Transmission technology ajanga kasa feature agütsür.

"LG Pay" nung mezüngbo credit card brand tongti; Shinhan, KB, BC aser Lotte indang credit card tem amshitetsü saka September ita tatem tashi nungbo tanemi credit card brand ajak indang credit card amshitsü asoshi atsülanga aotsü, Ta LG company ajanga metetdaktüsü.

G6 smartphone aser tawa adokba LG phone amshirtemi nem "LG Pay" software update

asüba ajanga amshitsü asoshi maongka agütsüsü. Company ajanga ashiba agi, parnoki iba service tanga device nunga amshittetsü asoshi maongka agütsüsü atema sentong lir.

Security atema 'LG Pay amshirtemi shishilembaba shia parnok indang 'fingerprints' scan asütsü nüngdaker, ta Company-isa metetdaktüsü.

Kasa mapang nung Samsung Electronics Co-i parnok South Korean bank asem den banking services amshirtem nem parnok indang 'Artificial Intelligence (AI)-based voice command programme' amshidaktsüsü asoshi molungtepogo, ta metetdaktüsü.

South Korean tech company Samsung ajanga ashiba agi, iba project kübok Shinhan Bank, Woori Bank aser KEB Hana Bank service amshirtemi 'Bixby' dang parnok indang bank account tem mesüra sen belenshiba osang sayutsü asoshi ola ajanga dang tetuyuba agütsütetsü.

Motorola Moto C sen 5,999 yong angutsü

June 2, 2017 (Agencies): Android Nougat OS keta aliba Motorola Moto C sen 5,999 yong angutsü. Motorola Moto C nung 64-bit quad-core MediaTek MT6737m processor den külemi 1GB RAM aser internal storage 16GB keta lir koba 32 GB tashi atsülangtetsü. Moto C nung sim ana tashi amshitetsü aser iba ajanga 4G VoLTE connectivity support asür.

Phone nung tesülen camer LED Flash dena 5MP aser 2MP selfie camera keta lir. Moto C phone ya temesüng aser tanak sentsü nung angutsü. Maneni phone nung battery tashi 2,350 mAh aser Android 7.0 Nougat operating system keta lir.

Moto C nung 480 x 854 pixels resolution dena 5-inch display keta lir. Iba phone ya alitsü atema brick-and-mortar store tem nunga angutsü.

Mongolia-i mezüngbuba satellite anünglaki yoktsü

June 3, 2017 (Agencies): Mongolia nung anguba shirem 'Mazaalai' nüngja agütsüba Mongolia nunger mezüngbuba satellite June 4 nü anünglaki yoktsü renema lir.

Iba satellite ya Florida nung Kennedy Space Center nung UNESCO aser Japan-i teyari agüja inyakba project nung yanglutetba "SpaceX Falcon 9" rocket den külemi yoktsü.

Iba Satellite ya 'cross-border interdisciplinary satellite project' ka lir aser iba ajanga 'non-space-faring' linük tem parnok indang mezüngbuba satellite yanglua yoktsüba nung teyari agütsür.

Küm ana iba project inyakba mapang nung Mongolia, Ghana, Japan, Bangladesh aser Nigeria nung kaketshir 15 tashi-i shilem agia liasü.

Satellite anünglaki yokba sülen Mongolia-i iba den anogo nung 5 ben nungi 6 ben tashi sendakteptetsü. Iba satellite ya alima nungi km 400 shi pilaa yoktsü.

Satellite ka aliba ajanga pei sasa anünglak bushisüngdangteter, linük indang noksa tangoka yuteter, map tejangja yangluteter aser yipru mopung aser menoknok amala alimar yimyatem tendangteter, ta Deputy Prime Minister and head of emergency affairs of Mongolia Khurelsukh Ukhnaa-i ashi.

Iba kasa telok ajanga 2019 küm satellite tanabuba yoktsü asoshi parnok sentong aliba lemsatop. Mazaalai satellite ya June 2 nü yoktsüba liasü saka tzünglu aruba ajanga athitsüsa aküm.



NEW DELHI, JUNE 3 : Tanü New Delhi nung AMP Motors showroom ka lapokba sentong nung Rohit Suri, Managing Director, Jaguar Land Rover India Ltd (JLRIL) aser Gurmeet Singh Anand, Managing Director, AMP Motors nungertem tangokba yangi noksa nung angur.

Bollywood nung tsüngsanger tajungtem rongnung Katrina Kaif ka lir: Salman

Mumbai, June 2 (Agencies): Salman Khan-i Katrina Kaif kanga saklokba teti jembir aser Brihostibarnü IIFA 2017 atema osangbener senden ka nunga pai iba olen jembisem.

Iba senden nung Katrina-i lai IIFA nung shilem agitsüba indang jembidang, Salman-i tiyongtsü nung "saka, nenoki la atema shisabulua tebilem. Iba industry nung tsüngsanger tajungtibatem rongnung la ka lir" ta osangbenertem dang ashi.

Salman-isa Alila Bhat repranga, "Katrina-Alia na kasasa lir," ta ashi. Saka Alia-i, "nibojunga metsüngsangteter" ta langzü.

IIFA 2017 nung Alia ya

'Udta Punjab' aser 'Dear Zindagi' film tem atema 'Best Actress' telemsa nung züngsema lir aser lai tang mezüng atema sentong nunga shilem agitsü.

"Ni iba benjung nung shilem agitsü atema renemer. Ni mejangdanga tsüngsanger. Ni iba sentong nung tadenertem tsüngdang shilem agitsü yongyar" ta laisa ashi.

Katrina Kaif-i taoba IIFA sentongtem nung shilem agia aruogo aser lai ashiba agi, "ni shilem tajung agitsü imlar."

IIFA 2017 ya New York nung aliba MetLife Stadium nung July 14-15 anogotem amungtsü sentong lir.

Northeast nung telungpur rara ajema kümdar: Rajnath



New Delhi, June 03, 2017: Honibarnü New Delhi nung osangbenertem senden ka ayongzüka tesüiba küm asem tsüingda BJP-i aniba NDA sorkar yimsüsüba mapang nung Home Ministry-i inyaktetba mapatem aser mapatongtem sangdongba mapang Union Home Minister, Rajnath Singh-i kaket ka sayatsüba noksa nung angur. Kasa noksa nungsa Ministers of State for Home Affairs, Hansraj Gangaram Ahir aser Kiren Rijiju na den Union Home Secy., Rajiv Mehrishi aser Principal Director General (M&C), Press Information Bureau, A.P. Frank Noronha nungera angur.

New Delhi, June 03

(Agencies): Northeast nung security sepaitemi telungpur 900 shi pua kiralongrar 52 tepseta telungpur mapatem anema inyakba ajanga NE nung telungpur dak sendakba rara ajema kümogo, ta tanü Union Home Minister, Rajnath Singh-i metetdaksü.

Singh-i ashiba agi, security sepaitemi Bodo telungpur telok NDFB(S) tongtoret raksatsüogo, aser ibaji ajanga tesüiba küm asem nung Modi-i aniba sorkari telungpur dak sendakba rara kanga ajema kümdaksüogo.

Paisa, NDFB telungpur 911 puogo aser 52 tepsetogo, iba den külemi kasa mapang

nungsa prangpong aser injang aika puogo, ta ashi.

"Onoki National Democratic Front of Bodoland/Saoraigwra (NDRB(S)) anema junga inyaktetogo," ta pai ashi.

"Parnok anema maneni rara aruogo. Onoki parnok tongtoret raksatsüogo," ta pai osangbenertem dang ashi.

Singh-isa, Northeast tesem nung telungpur anema küm aika raraa aruba sülen tesüiba küm asem nung security sepaitemi telungpur anema maneni inyaka aruba ajanga tesem nung tesünep lir, ta ashi.

1997 küm nungi tenzüka telungpur dak sendakba rara tajemtibaji 2015 küm liasü aser

2016 küm ano tajemba aküm.

Paisa, 2014 küm telungur dak sendakba rara tatalokba 824 liasü aser 2015 küm nungbo 524 dang liasü aser yakumbo 484 tashi ajema alu, ta ashi.

Northeast nung civilian asüba-a ajema aluogo. 2015 küm civilian 48 asü aser 2016 küm nungbo 46 dang asü.

2008 küm nungbo civilian 466 tashi asü.

Tesüiba küm asem nung Home minitry-i inyaktetbatem indang metetdaksüdang pai item osang ya lemsatepa liasü.

2014 küm nisung apuba tatalokba 369 liasü, 2015 küm 267 liasü aser yakumbo tatalokba 168 dang liasü, ta paisa metetdaksü.

July 1 nungi GST mapa küma inyaksü state temi melunger

New Delhi, June 03 (Agencies): Honibarnü GST (Goods and Services Tax) Council-i anünga aliba ozüingtem ajak nung telemtetba agiogo, aser July 1 nungi tenzüka iba ya mapa küma inyaksü atema state temi melungogo.

Senden temangba sülen New Delhi nung osangbenertem den jembidang Kerala Finance Minister, Thomas Isaac-i, "Onoki ozüingtem nung o lemtepo,

aser iba maparen tembangogo. Transition ozüingtem ajak latetogo, aser July 1, 2017 nungi tenzüka iba ya mapa küma inyaksü atema ajaki melungtepogo," ta metetdaksü.

Taoba ita GST Council-i goods 1,200 aser service 500 nung saru shilem 5, 12, 18 aser shilem 28 lateta liasü.

Taruba Honibarnü Union Finance Minister, Arun Jaitley leniba nung 15buba GST

Council senden amentsü, aser iba mapang nung hon, textiles aser tsüingsem densema osettsüset trok nung saru shilem latettsü.

West Bengal Chief Minister, Mamata Banerjee-i, lar state-ibo tang ama telatetbatem nung ajemdaker iba maparen meinyaksü, ta jembioogo, ajisüaka Honibarnü senden nungi West Bengal state Finance Minister, Amit Mitra-a adentsü, ta osang angazüker.



Bhubaneswar (Odisha), June 03, 2017: Honibarnü Bhubaneswar nung Pehchan Identity Cards aser Hathkargha Samvardhan Sahayata lemtsüba sentong nung Minister of State for Petroleum & Natural Gas (Independent Charge), Dharmendra Pradhan-i teka mapa balala inyaker nungtugu nisungtem den külemi tangokba noksa nung angur.

NIA-i Srinagar aser Delhi nung tesem aika mita ao

New Delhi, June 03 (Agencies): Pakisan nung amenoka aliba teloktemi Kashmir nung rara adokdaksütsü atema senotsü agütsüba dak sendakba nung NIA-i Srinagar, Delhi, aser Haryana nung tesem 23 mita aodang sen crore ka dak tema puogo, ta Honibarnü NIA-i metetdaksü.

NIA-i Srinagar nung tesem 14, Delhi nung 8 aser Haryana nung tesem ka mita oa liasü, aser item tesem rongnung Delhi nung Ballimaran aser Chandni Chowk aser Hayrana, Sonepat nung cold storage ka densema lir, ta NIA ketdangser kati ashi.

NIA-i apuba sen nungji Srinagar nungi sen lakh 65-70 aser Delhi nungi sen lakh 35-40 lir, ta ketdangserisa ashi.

Pai ashiba agi, separatist lenir asem- Tehreek-e-Hurriyat lenir Ghazi Javed Baba, Jammu & Kashmir Liberation Front lenir Farooq Ahmed Dar (Bitta Karate) aser Hurriyat lenir, Nayeem Khan nunger ki densema Srinagar nung

tesem 14 mita ao.

Sting operation video ka nung separatist lenirtemi, Ballimaran aser Chandni Chowk (Delhi) nung inyaktermi Pakistan nungi senotsü agizüker, ta metetdaksüba sülen Delhi nunga tesem ana ya densema tesem 8 mita ao.

Khan-i, Kashmir nung rara adokdaksütsü atema Pakistan nungi sen agizüker ta nangzüker, aser iba video ji May 16 nü prokshia liasü.

Hombar aser Mongolbarnüa Delhi nung NIA-i separatist lenir asem dang asüingdangyaa liasü.

May 20 nü NIA-i tai tonglokja alir nisung 13 dang Kashmir nung school aser sorkar kiojentem rondoktsüba dak sendakba nung asüingdangyaa liasü.

NIA ketdangsertemi ashiba agi, yaküm July ita nung India sepaitemi Hizbul Mujahideen commander, Burhan Wani tepsetba sülen Lashkar-e-Taiba aser Pakistan nung tanga teloktemi Kashmir nung rara adokdaksütsü atema separatist lenirtem senotsü agi yaria arur.



New Delhi, June 03, 2017: Honibarnü New Delhi nung Election Commission-i ayongba sentong ka nung yimtenren party ka nungi teshimtet lenirtem dang Voter Verifiable Paper Audit Trail (VVPAT) machines amshia sayuba noksa nung angur.

J&K nung telungpurtemi army ana tepset

Srinagar, June 03 (Agencies): Tanü south Kashmir, Kulgam district kübok Srinagar-Jammu national highway nung telungpurtemi Army convoy ka amakdang sepaia aser pezü yiruogo.

Srinagar nungi kilometer 100 shi pilar aliba district kübok Qazigund nung aliba Lower

Munda toll post anasa telungpurtemi army convoy amakdang sepaia trok yirutsü, ta army ketdangser kati metetdaksü.

Paisa, yirua alirtemji Srinagar nung aliba Army indang 92 base hospital-i anir ao, ajisüaka sepaia anabo meküzmükteti asü, ta shisem.

PM Modi-i France Tir Macron ajuru

New Delhi/Paris, June 03 (Agencies): Honibarnü France yimtiba, Paris nung aliba Elysee Palace nung India Ato kilonser, Narendra Modi-i tang tasen shimba France Tir, Emmanuel Macron ajuruogo.

Iba senden nung lenir anati linük ana tesendaktep onüktem, kiralongra anema rara aser climate change onüktem nung o lemtepa liasü.

Iba dak sendakba nung Ministry of External Affairs otongdar, Gopal Baglay-i twitter ajanga, "Paris nung PM @narendramodi-i France Tir


tasenba, Emmanuel Macron ajuruogo," ta metetdaksü.

Tanep Ato kilonser, Modi Paris yimti tonga arua liasü.

Hokolbarnü Modi-i tang mezüing Russia nung St. Petersburg International Economic Forum senden nung dena liasü.

Iba senden alidang jurila senden balala nung Modi-i UN Secretary General, Antonio Guterres, Austria Chancellor, Christian Kern aser Eurasian Economic Union Mendenbuba, Tigran Sargasyan nungera ajuruo jembioogo.

Japan & France nati Asia-Pacific nung US lenisüba pela agizüker



June 3, 2017 nü Singapore nung 16 puba IISS Shangri-La Dialogue nung South Korea Defence Minister Han Min-koo, U.S. Secretary of Defense James Mattis aser Japan Defence Minister Tomomi Inada nungertem teka amteper agiba noksa ka angur.

Singapore, June 3 (Agencies): US lenisüba kübok Asia-Pacific nung North Korea indang nuclear maparen aziüoktsü merangba aser iba tesem nung yimjung atema mapa inyakba pelashishia agizüker, ta Japan aser France nung defence minister temi tanü metetdaksü.

America-i Asia-Pacific nung mapa inyakba aser North Korea anema nokdakba atema Japanese Defense Minister Tomomi Inada-i pelaba ashi.

"United States ya mapang talangka tejakdang nungi Pacific nung tashi ka lir. Indo-Pacific nung yimjung alitsü aser tensa meraksatsü atema United States-i maneni akhüm agüja mapa inyaker. US-i mapa tajung inyakba onoki pelaa agizüker," ta Inada-isa shisem.

"Japan-i Trump sorkar den tesentaktep akangshir aser tali amalitep alitsü meranger. North Korea ajanga lendong bener arutsütsü khuretji ulura, anungji asenok longjemer North Korea aziüoktsü atema inyaksüla" ta paisa metetdaksü.

North Korea ket nungi nuclear weapons ajak agentsü atema mapa inyaksü mulunga lir aser iba nung mitkar tashi amshitsü akok, ta US Secretary of State Rex Tillerson-i taoba mapang metetdaksüogo.

Honibarnü US Defense Secretary Jim Mattis-i ashiba agi, "North Korea-i United States aser tanga linüktem amokmerentsü atema nuclear-armed missile ka yanglutsü merangba nung lendong tulu keta lir."

Singapore nung ayonga agiba Shangri-La Dialogue nung

Mattis-i linük 39 nungi defense ministers aser mongin nisungtem den o jembi.

Putu 21 puba nung nuclear tests agiba linükji North Korea dang lir aser yaküm kija parnoki anaben tashi nuclear tests asü, ta French Minister for Armed Forces Sylvie Goulard-ia ashi.

"North Korea inyaksangshi ajanga tesem nung tensa mejungi kümdaktsür aser mepetmesü adokdaksür. Iba tesem nung onoki rongsentketsüing maparen tulu inyaker aser linük o linük tstüingda rara madokdaksünür" ta Goulard-isa shisem.

US-i Asia-Pacific nung lenisüba ajanga South China Sea nung senzüsönbongtsü nüjiso angur aser ozüngtem meraksar, ta linük anaprong nungi defense minister temi ashi.

Australian PM Turnbull-i China amokmerener

Singapore, June 3 (Agencies): China-i temeket aliba linüktem madak tashiyim amshira, linük tilatem longjemer China anema nokdaksü, ta Singapore nung sentong ka nung jembidang Australia Prime Minister Malcolm Turnbull-i ashi.

Hokolbar nikongdang Shangri La security summit nung okila jembidang, Turnbull-i "Australia aser Singapore ama linüktemji tila saka onok indang sovereignty metsüngareta ameta lir" ta metetdaksü.

Korean peninsula aser South China Sea nung mangatettep ken o tem adoka aliba atema jembidang Turnbull-i "asen tesem nung ozüng kübok aliba

aser linük tila aser tulutem indang sovereignty akhümstüba ajanga yimjung alitsü" ta ashi.

China-i North Korea aziüoktsü atema mapa inyaksüla aser iba jagi tanga linüktemi China dak temulung alemtsü.

South China Sea nung China-i asetkong yangluba mapa anentsüla. Tangar litsü atsüngbanga agitsüba mesüra mangatettep aliba tesemtem nung mitkar ayuba inyakyim masü saka amalitepa ken o tem angatetteptsüla, ta paisa shisem.

"China-i tashiyim amshira, kidangsüa aliba linüktem longjemer anema apusotsü" ta Turnbull-isa amokmerena jembi.

Tan ita Syria yimjung olemtep alitsü

Moscow, June 3 (Agencies): Syria yimjung olemtep tan June ita tomle Kazakh yimtiba nung alitsü ta Russia nung Syria ambassador-i Honibarnü metetdaksü.


Iba olemtep nung Russia, Iran aser Turkey linüktem adentsü, ta Ambassador Riyad Haddad-i ashi.

"Astana nung June 12 aser 13 agogotem olemtep alitsü jaokba shidi nguogo" ta Haddad-isa shisem. Ajisüaka, Syria nung

telungpur telok anatibo parnok dangi shidi maru ta ashi.

May ita tesüsaba olemtep nung Syria sorkar pusemertem- Russia o Iran aser telungpurtem pusemer Turkey linüktemi rara ajema kümdaktsütsü atema "de-escalation zones" pezü shimtsü lemtet.

Parnoki shimba "de-escalation zones" nung anüing nung tayimtsütemi bomb pokloktsüba malitsü lemtet aser ibaji ajanga rara tajemba kümdaktsüogo.



June 3, 2017 nü Paris nung aliba Elysee Palace nung France Tir, Emmanuel Macron-i India Prime Minister Narendra Modi den ajurutepdang agiba noksa angur.

US-i anir inyakba airstrikes nung civilian 43 tepset

Raqqa, June 3 (Agencies): Syria kübok Raqqa yimti nung US-i anir tayimtsütem amshia amakdang civilian 43 tepset, ta Honibarnü ketdangsertemi metetdaksü.

Tayimtsütem jagi Raqqa nung al-Jamili ki dak tenük yoka amak aser iba mapang tetsür aser tanurtem aika asü, ta SANA news agency ajanga ashi.

US-i Raqqa nung tayimtsütem amshia kiralongrartem amakba maparen nung civilian aika taküm laludar. Iba yimti ya Islamic State (IS) kiralongrar telok indang yimtiba ka ama lir.

Anogo ana tejakdang Raqqa nungsa US-i anir tayimtsütem ajanga amakdang civilian 20 tashi tepset. Taoba Deobar nüa

kasa tayimtsü agi amakdang civilian 20 tepset.

Taoba Brihostibarnü IS-i agia aliba Mayadeen yimti nung airstrikes ajanga civilian 35 tashi tepset. Syria sorkari civilian tem tepsetba tatalokba aija arur aser parnoki Syria nung US-i anir kiralongrar anema raraba inyakyimji ozüngi memelar, ta tai tongloktsür.

Turkey nung PM Yildirim indang advisor apu

Ankara, June 3 (Agencies): Turkey Prime Minister Binali Yildirim indang chief adviser Honibarnü puogo. US nung amenoka aliba Muslim putir Fethullah Gulen den tesentaktep lir ta temulung melemi bilemba atema pa apu.

Birol Erdem ya taoba justice ministry ketdangser ka liasü aser pa den Gulumser Erdem na Ankara nung apu, ta Anadolu news agency ajanga metetdaksü.

Gulen-i aniba telok nung pa züngsem ka liasü ta tai tongloktsü, ta parnokisa ashi.

Turkey sorkari ashiba agi, yaküm July 12 nü Tir Recep Tayyip Erdogan atsüngdoktsü atema Gulen-i tetuyuba agütsü.

Gulen ya 1999 nungi US kübok Pennsylvania nung liyonga arur aser Turkey sorkari pa dak tai tongloktsübaji pai magizüker.

Gulen den tesentaktep lir ta

temulung melemi bilemba sorkar ketdangser tejentem rongnung Erdem ya la lir. Erdogan indang aide-de-camp Colonel Ali Yazici dena tanga tongti ketdangser aika sorkari pua lir.

Yaküm sorkar atsüngdoktsü merangba sülen nungi sorkari nisung 50,000 dak tema puogo. Parnok rongnung obendangertem, okatsürtem, police ketdangsertem aser armed forces nung züngsemtem dena lir.

Parnok Gulen den tesentaktep lir ta tai tonglokja lir, ta justice ministry ketdangsertem taoba hopta osangbener dang ashi.

Maneni, Turkey nung doctors, civil servants aser academics dena public sector nungi nisung 100,000 dak tema Gulen den tesentaktep aliba atema tai tonglokja mapa nungi anentsüogo.



June 3, 2017 nü Burmarrad, Malta nung Prime Minister aser Labour Party lennir Joseph Muscat-i snap general elections atema pa indang vote agütsüba noksa nung angur. (Burmarrad, June 3)

Jharnapani nung aliba
AO HOTEL,
New Chumukedima-i
belenogo.

CONTACT NO .
7005469087
8974565478

EC-i ayongba EVM... (TAPAK 1 NUNGI)

Maharashtra Municipal Elections nung amshiba EVM dak sendakba nung NCP-i asüngdangba ka langzüdang Zaidi-i, "Onoki guarantee dang asütsü akok mesüra EC indang EVMs dang certify asütsü akok; EVMs mesüba yangluba (prototype) atemabo onoki guarantee agütsütsü makok," ta Maharashtra Municipal Elections nung amshiba EVM Maharashtra-i urban local body elections atema amshiba EVMs ji ECI indang masü," ta Zaidi-i NCP dang ashi. Ano külen CPI (M)-ia EVMs hackathon nung shilem magi, saka EVM inyakyim indang ang metetnüa liasü, ta Zaidi-i ashi.

GOVERNMENT OF NAGALAND DIRECTORATE OF EMPLOYMENT, SKILL DEVELOPMENT & ENTREPRENEURSHIP NAGALAND: KOHIMA

NO.DET-2/14/2001/PT-1/

Dated Kohima, the 2 nd June'2017

ADVERTISEMENT

Applications in the prescribed form are hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session commencing from August, 2017.

Name of the Institutes, sanctioned trades, duration of courses and minimum Educational qualification required are given below:

SESSION: AUGUST 2017- JULY 2018

Sl. No	TRADES	DURATION OF COURSE	MINIMUM EDUCATIONAL QUALIFICATION	NAME OF GOVT ITIs
A. Engineering Trades				
1.	Carpenter	1 year	8 th Passed	Kohima, Mon, Wokha, Phek, Tuensang.
2.	Plumber	1 year	8 th Passed	Kohima, Phek, Zunheboto.
3.	Welder	1 year	8 th Passed	Kohima.
4.	Mason(Building Constructor)	1 year	8 th Passed	Kohima.
5.	Mechanic Diesel	1 year	10 th Passed with Mathematics	Kohima, Tuensang.
6.	Surveyor	1 year	10 th Passed with Maths & Science	Kohima.
7.	Draughtsman(Civil)	2 years	10 th Passed with Mathematics	Mokokchung
8.	Electrician	2 years	10 th Passed with Maths & Science	Kohima, Mon.
9.	Mechanic Motor Vehicle	2 years	10 th Passed with Mathematics	Mokokchung, Wokha, Tuensang
10.	Information & Communication Technology System maintenance (I&CTSM)	2 years	10 th Passed with Maths & Science	Kohima
11.	Machinist	2 year	10 th Passed with Mathematics	Kohima.
B. Non- Engineering Trades.				
1.	Cutting & Sewing	1 year	8 th Passed	Kohima, Mon, Tuensang, Wokha, Phek,
2.	Knitting	1 year	8 th Passed	Kohima, Dimapur, Mon.
3.	Computer Operator & Programming Assistant(COPA)	1 year	10 th Passed	Kohima, Mokokchung, Dimapur, Zunheboto, Mon, Wokha.
4.	Sewing Technology	1 year	10 th Passed	Dimapur.
5.	Hair & Skin Care	1 year	10 th Passed	Kohima, Dimapur, Phek.
6.	Stenography	1 year	10 th Passed	Dimapur.
7.	Secretarial Practice	1 year	10 th Passed	Dimapur, Mokokchung.
8.	Dress Making	1 year	10 th Passed	Zunheboto.

- N.B:**
- Candidates applying for the admission should be above 14(fourteen) years as on 1st August, 2017 & there is no upper age limit.
 - Application forms are obtainable from any ITI on any working day during office hours.
 - Seating capacity in each trade is 20 (Twenty) except for Carpenter & Knitting trades in ITI Kohima is 40(forty) each.
 - All trades are under SCVT except Carpenter (1 unit), Surveyor, Mechanic Diesel, Welder, Electrician, Machinist, Mechanic Motor Vehicle trades of ITI -Kohima and Secretarial Practice of ITI, Mokokchung fall under NCVT.
 - Cost of application form is Rs. 50/- (Rupees Fifty) only.
 - Only women candidates need apply for Women ITI, Dimapur.
 - Selected candidates will be paid stipend @ Rs.500/-PM.
 - Last date of submission of form is 30/06/2017.
 - Date of Entrance test :

a) 6th July' 2017	- Non Engg. Trades: -	Morning -	10:00 am (under Matric Trades)
		Afternoon	- 12:00 pm (Matriculate Trades)
b) 7th July' 2017	- Engg. Trades: -	Morning -	10:00 am (under Matric Trades)
		Afternoon-	12:00 pm (Matriculate Trades)
 - Declaration of Entrance result 18th July' 2017.
- Sd/-
MUTHINGNYUBA SANGTAM
Director,
Employment, Skill Development & Entrepreneurship
Nagaland, Kohima

Issued by: DIPR

GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA

Dt. Kohima, the 3rd June, 2017.

NOTIFICATION

NO. DTEI ESTT-2/12/20 1 7 : Applications in plain paper is invited to undergo 3 year B. Sc. in Hospitality and Hotel Administration for the academic session 2017-1 8 at Guwahati and Shillong.

ELIGIBILITY :-

- QUALIFICATION :- Passed 10+2 from CBSE, ISE, State Board of Examination with English as one of the subject.
- AGE LIMIT :- For General and OBC categories age should not be more than 22 years as on 1st July'2017. Maximum age relaxable upto 25 years in case of SCI ST candidates.

Interested candidates may submit their applications supported by all the necessary documents to the office of the undersigned on or before 15th-Ju ne92017. Selection of candidates will be done on the basis of academic marks.

Issued by: DIPR

(ER. ARJUN SINGH)
Director

TEMEIM JABASO ASÜR NUKSHILONG LEMTUR BILEMTETTER



Temeimtiba Along, Nai onok toktsür tanü küm ka ajunger. Onok mulung nung na mebileteti ang anogo kata mesür. NAI TOKTSÜR AOKA MULUNGJANGTEM NUNG NA KODANGA MASÜTSÜ
Onoki na kanga menungrar !
Ola madoki nüktsü yima sarasadema amonger.
- Temeim tsürabur & kinungertem.



OFFICE OF THE DIMAPUR NOKPU SENSO TELONGJEM DIMAPUR - 797112 : NAGALAND

TEPELA LEMSATEPER

Ao Senden 2017 nungi Ao kin len anitsü ketdangpurtem tasen shimba rongnung ozü senso tajung, Wb. Chubawati Longchar, Vice President menden nung shimba asoshi tenüngsang agütsüba den külemi pelaba lemsateper.

Parnok lenisüba nung Ao kin dang masü saka Nokpu kin ajunga lenisütsü asoshi Tsüngremi pa aser ketdangpurtem ajunga taküm mapang aser sempet maneni moajangma.

(IMOTEMJEN LONGCHAR)
President
DNST

(IMTINIKEN IMCHEN)
Secy - Secretary
DNST.

OFFICE OF THE NOKPU VILLAGE COUNCIL DISTRICT- MOKOKCHUNG, NAGALAND TENÜNGSANG TETUSHI AGÜTSÜR

Nokpu Rionsanger Putu rongnungi ozü senso tajung, Wb. Chubawati Longchar, Ao Senden lokti ketdangsüba menden nung Vice President mapa inyaksü shimba angashia tenüngsang agütsür aser Nokpu Senso ajungai Ao Senden den pelaba lemsateper.

Lokti lenisüba wadang nung nokdaka alidang asen teyanglur Tsüngremi maneni pa shisatsü, tangatetba aser temoatsü moshia moajang ta Nokpu Rionsanger Putu ajungai sarademsür.

Sd/-
L. Yanger Walling
Chairman,
Nokpu Village Council

Sd/-
Limasunep Lkr
Secretary
Nokpu Village Council



OFFICE OF THE UNGMA SENSO MUNGDANG UNGMA, MOKOKCHUNG, NAGALAND.

TENÜNGSANG AGÜTSÜR

Ungma Senso Mungdang-i ozü senso tajung Wb. Imtiyapang s/o Rev. A Nungshi-i Naga Students' Federation (NSF) nung General Secretary (2017-19) menden tongtetba atema pa nem tenüngsang tulu agütsür. Iba den külemi NSF danga maongka agütsüba atema pelaba lemsateper.

Tsüngremi asen lenir aser NSF maneni moajangma.

Sd/-
(TAKOYANGERTATAR)
PRESIDENT
Ungma Senso Mongdang

Sd/-
(DR. RONGSENSUSANG)
GENERAL SECRETARY
Ungma Senso Mongdang

TEPELA SANGDONGER

CBCNEI kübok tetsürtem rongnungi mezüng Ordained minister jenjang angula Tsürabur samanir Rev. Dr. Noksangchila, la nem Ao Theological Association (ATA) 31 buba Inti mungdang nung tetushi tulu aketba Rev. L. Kijungluba Ao, Life Time Ministerial Award agütsüba asoshi Yaongyimsen Laishir Telongjem-i ATA dang kanga pelar. Tsürabur shibai iba tetushi konang ngutetsüsa Kibuba tenzüka liteta aruogo, la nem akümtsübu tenüngsang agütsür. Tsüngremi la ama Ao Laishir aika atokdakjang ta sarasademer.

Yaongyimsen Laishir Telongjem

CHURCH league 2017 tembangogo; DABA-i takok angu



Asayamong akoker Dimapur Ao Baptist Arogo telok (mezüng tarensen) aser tanabuba jenjang angur Chumukedima Ao Baptist Arogo telok külemi agiba noksa nung angur.

Dimapur, June 03 (TYO): Church League 2017 tanü Dephubar ground nung CABA aser DABA na final asaya tembangogo. Ita asem tashi iba asayamong Dimapur aser temeket nung aliba arogo balala tsüngda asayaa liasü. Final asaya nung DABA-i 3-2 agi CABA madak takok angu.

Church League 2017 ya TEAMMATE puri ayongzüka liasü. Parnoki asaya balala ajanga Nagaland nung Tsüngrem osang prokshir.

Teamnte puri Tsüngrem osang perokba aser football asayaba den külemi asayartem aser sentepa aliba telok ajak asaya dak ajemdaker lenmang

aisü nungi taküm tepeyong benshia aotsüba tangazükba balala agüja liasü.

Iba asayamong ya arogo balala nungi lanurtem tesendaktep akangshitsüba aser jangratem asayatsüba dak alaka ano parnoki lanur asayar tajung bushitetta parnok jenjang temaba nung shimtsü asoshia maongka agütsütsü nükjidong nung ayonzük.

Coach Daniel shiba All India football federation nung license football coach ka lir, pa dang iba asayamong indang asüngdang dang pai ashiba agi, "Iba ya kanga dang sentong tajungka lir aser osang tajung proktsü asoshi tanga kin arogo tema

jaoktsüla. Ministry tem rongnung kanga junga shishadanger inyakba rongnung iba yaa tajungtiba ka lir aser lanurtem sempet aketba asayar tajung aika ni angur."

Asayamong ayongertemi asaya ajanga osang tajung peroktsü asoshi temolung nung yur iba sentong ayongzüka. Asayamong Tatembangbuba sentong nung, Sumi Students Union dimapur, Nagaland football Coaches Association, youth pastor tem, Ao lanur entrepreneur, Baptist youth fellowship dimapur, youth advisor tem aser arogo balala nungi sanükertem jaoka liasü.

Angh Acharya-i ketdangsüa Puroik...

(TAPAK 1 NUNGI...)



Parnokisa Jawahar/Pada, community reliant village, SNTD Campus, Ruparel College semdangtsü aser Arunachal Students Union Mumbai dena ajuruteptsü, ta laisa ashi.

Parnoki Vidyanidhi Infortech Academy nung personality development & soft skills indang

workshop ka nung adentsü aser tatembang anogo nung Maharashta sobaliba telok ka den sentong agitsü, ta Kamath-isa shisem.

Iba sentong nung Dr. Hanmanthrao Palep, Indian National Fellowship Centre, Working President, Mr. Dilip

Paranjape, Indian National Fellowship Centre, Trustee General Secretary, Mr. Suresh Sathe, Indian National Fellowship Centre, General Secretary, Working Committee, Savitha Thakur, Uday Karandikar, Arun Deo aser Miss Kamath nungertem teyari agütsür.

Election Department den yariteptsü atema State Core...

(TAPAK 1 NUNGI...)

State Core Committee indang sendenji June 14, 2017 anepdang 11:00 ako nung Conference Hall, Hotel Japfu Kohima nung amentsü. Anungji züngsem ajaki action plan bener arua lemsateptsü metetdaksür, ta sangdong nung metetdaksü.

Iba dak sendakba nung osang metetnürtemi Deputy Chief Electoral Officer den office mapang phone number 2292313 mesüra toll free number 1950 ajanga tongteptsü akok, ta sangdong nungsa shisem.

STATE CORE COMMITTEE

Sl No	Name & Designation	Department/Organization
1	Director	Higher Education
2	Director	Technical Education
3	Director	School Education
4	Director	Youth Resources & Sports
5	Director	Information & Public Relations
6	Gen. Manager	Nagaland State Transport
7	DPS	Postal Service Department
8	Director	Municipal Affairs
9	Convenor	State level Bankers' Transport
10	Station Director	All India Radio
11	Station Director	Doordarshan Kendra
12	State Organization Commissioner	Bharat Scouts & Guides, Nagaland
13	Group Commander	NCC, Nagaland
14	State Liaison Officer	National Service Scheme, Nagaland
15	Youth Coordinator	Nehru Yuva Kendra Sangatham, Nagaland

Praneeth Thailand open final-i iogo

Bangkok, June 3 aser iba sülen maneni junga (Agencies): India nung badminton asayar B Sai Praneeth-i Thailand open semifinal asaya nung Thailand nung asayar Pannawit Thongnuam minute 36 agia tebur kija asaya nung 21-11, 21-15 agi ayong ayonga kokogo.

Alima nung tebur asayartem rongnung jenjang 24 nung alisang India nung asayar ya final nung Indonesia nung asayar Jonatan Christie den asayatsü. Jonatan-i semifinal asaya nung Malaysia nung asayar Joo Ven Soong 21-9, 21-18 agi minute 34 agia akok.

Honibarnü asaya nung Praneeth-i kanga junga point 4 agi tejakdang sür asaya tenzüik

asaya pai mezüngbuba asaya 21-11 agi akok.

Semifinal tanabuba game nung Pannawit-i akoktsü asoshi kanga meranga asaya saka Praneeth-i pa dang nungi tajungba asayateta iba game 21-15 agi ayong ayonga akok.

Olympic nung medal angula Saina Nehwal iba asayamong nung Honibarnü asaya tamakok ngua asayamong nungi toguogo.

La Thailand tsür Busanan Ongbamrunghan-i 19-21, 18-21 agi tsükdaksü. Tena asaya minute 53 tashi asayaa liasü.

Alima nung jenjang 11 nung alila Saina iba asayamong nung tanabuba jenjang nung liasü aser la den asayala ya jenjang pezübuba nung liasü.

Andt Murray, Alize Cornet quarter final tongogo



Alize Cornet



Andy Murray

Paris, June 3 (Agencies): French open tasembuba round asaya nung Murray-i 7-6(8), 7-5, 6-0 agi del Potro madak takok nguogo. Asaya mezüngbuba set nung tiebreak ajanga Murray akok aser iba sülen tanabuba atonga akok. Tasembuba set nung Potro-i game kata mokoki 6-0 agi Murray-i ayong ayonga akok.

Taoba mapang nung Murray aser del Potro na kanga toktepa asayaa aruba otsü lir aser iba asayamong nunga tang tashi asayaa aruba rongnung Murray atema iba asaya ya tasaktiba

liasü. Pa iba asayamong akoktsü asoshi imla rongnung kangabo metetshir saka iba asaya akokba ajanga pai pa sasa dak tali temolung lema bilemstsü.

Honibarnü tetsür asaya tasembuba round nung Agnieszka Radwanska-i 6-2, 6-1 agi Alize Cornet madak takok angu.

Maneni tetsür asaya nung Simona Halep-i Daria Kasatkina 6-0, 7-5 agi koka taruba round-i iogo.

No. 11 seed Caroline Wozniacki-i Catherine Bellis madak takok ngua Round of 16-i iogo.


Honibarnü asaya osang yamai alitsü:

TEBUR KIJASAYA:

No. 1 Andy Murray-i No. 29 Juan Martin del Potro, 7-6(8), 7-5, 6-0 agi akok. No. 7 Marin Cilic-i Feliciano Lopez, 6-1, 6-3, 6-3 agi akok. Fernando Verdasco-i No. 22 Pablo Cuevas, 6-2, 6-1, 6-3 agi akok. Kevin Anderson-i Kyle Edmund, 6-7(6), 7-6(4), 5-7, 6-1, 6-4 agi akok.

TETSÜR KIJASAYA:

No. 3 Simona Halep-i No. 26 Daria Kasatkina, 6-0, 7-5 agi akok. Alize Cornet-i No. 9 Agnieszka Radwanska, 6-2, 6-1 agi akok. No. 11 Caroline Wozniacki-i Catherine Bellis, 6-2, 2-6, 6-3 agi akok. No. 21 Carla Suarez Navarro-i No. 14 Elena Vesnina, 6-4, 6-4 agi akok. No. 28 Caroline Garcia-i Su-Wei Hsieh, 6-4, 4-6, 9-7 agi akok.



Tanü South Africa o Sri Lanka na Champions Trophy Group B asayamong nung South Africa nung AB de Villiers-i ball indangindanga stump nung onshia Sri Lanka nung Dinesh Chandimal 'run out' sütsür pelaba yangi noksa nung angur. (The Oval, June 3, 2017)

BILEMDANGANG
"Temeim mapa inyaktsü asoshi nungnanga teli."